



淮海英靈集
四





集靈英海淮

(四)

輯元沅

淮海英靈集

程名世

字令延。號筠榭。江都人。與方扶南。杭菴浦。厲樊榭。沙白岸。章樂軒。杜補堂。江澄里。諸公爲詩友。賓客文酒之譙。埒於馬氏。乾隆壬午南巡。賜四品頂帶。所著有思純堂集。秋水芙蓉館集。小酉館集。海上

集。撈蝦集。柘溪漁長集。老屋吟。飲淥吟。若干卷。詩餘一卷。樂府一卷。又有左傳識小錄。國策取譬。莊子實言。老管荀韓四子。楞嚴。法華。維摩詰。三經註本。藏于家。子贊和。贊皇。贊寧。贊普。

過曾襄愍公墓

勝代論鄉哲。惟公善用兵。功揮大丞相。名重十先生。東市刑何慘。西陲計未成。可憐檀道濟。空自作長城。

爲杜補堂太守題野寺尋碑圖

明殉難總兵卜從善墓碑。在衛輝府。

崇禎之末蒼鳶愁。流寇劫掠殘中州。衛扼河朔賴誰守。將軍智勇非常儔。中州自決汗隄水。嵩瀟蕩汨無堅壘。抽戈奮起獨登埤。誓報主恩惟一死。此時賊兵如蟻屯。愁天黑壓營頭雲。已屠懷州便入衛。萬骸撐拄高成墳。仰天大呼臣力竭。炯然蹈刃完臣節。從容溫序肯污須。慷慨萇宏深瘞血。河間太守杜陵叟。白髮詩名滿宇宙。卻因迎養履殷墟。弔古停驂幾搔首。聞說城陰片碣存。扶筇挈伴尋荒墳。空餘螭首埋荆棘。唯有啼雅繞墓門。歸來作詩寫吳練。更畫韓陵石一片。尺幅能招百戰魂。一篇可補孤臣傳。君不見逆奄禍國罪塞天。巍巍先世留遺阡。公昔典郡瀛海日。曳碑發塚夷爲田。又不見降闖老姦魏藻德。俎豆潞河猶竊食。公白行臺頓徹之。只用單詞當誅殛。嗚呼。循吏若此古亦稀。表忠鋤佞彰幽微。磊磊落落數大

事勝于史筆爭是非。

題兒子贊和騎牛圖

杏花已白蒲葉長。澗澗清流隴畔響。飯牛晨起事農功。南畝東菑任騎往。我生習懶懷晏安。不分五穀人譏訕。圖爾牛背亦有意。要知稼穡之艱難。古來叩髻多樵牧。挂角何妨勤補讀。不願爾作多牛翁。但爲識字耕夫亦已足。

次韻江鶴亭焦山夜坐詩

名山屬良夜。詩思如潮湧。吟嘯振幽巖。氣壓山魍恐。宵深落霜華。欲出輒旋踵。小坐愛疎寮。靜對諸峯聳。分題同朋曹。擊鉢偕釋種。詎畏蓮漏催。聊借禪衲擁。風多易生寒。樹古久合拱。劇韻勉爲步。敢曰賈餘勇。望家書不至。

漏永怨長夜。羈懷總不禁。一家三處住。萬事五更心。歸夢尋偏遠。音書滯至今。嘹嘹南去雁。爲爾幾沈吟。

貨圃八咏竝序

貨圃者。柘溪喬氏真意堂。去寶應五十里許。戊子冬。假館于茲。故得詳所歷。粵圃在宅後。環圃以牆。牆東啓小扉。有亭植叢桂。予顏之曰泰阿。由亭而東爲堂。面深池。倚修竹。曰客居所居堂。卽真意堂也。堂左有廊。界以小牆。畫一爲二。居中聽外。足音窅然。因似登音名之。循廊達黃楊館。頗幽遠。蓋堂居中。右顧有廊。左顧有亭。屋不必多。結構特妙。堂後池曰釣魚閒處。竹旁屋。曰何可一日無此軒。徑數轉。登層樓。則雞犬桑麻。歷歷寫下。七八月間。黃雲滿目。爰取詩人我稼既同之語。名曰稼同樓。樓下疊石爲巖。松柏合拱。超然有遠致。所謂松石間意。不當如是耶。

真意名最佳。悠然有餘思。我借少陵詩。聊記客中事。容居所居堂。原名真意堂。

素蕊飄天香。無聲和冷露。分得泰山阿。豈僅淮南樹。

涉世有窮通。讀書悟悔吝。對樹一開顏。今年不逢閏。

幾曲小廊幽。寥寥少來往。日暮盼詩人。如聞足音響。

冷翠愛幽篁。暑氣了不受。何可一日無。散髮臥北牖。

謾謾幾株松。磊磊數疊石。解帶此盤桓。形神兩俱釋。

頻年大有書。秋來腹可鼓。閒日上樓時。看見農人苦。

一泓見澄渟。始識靜者妙。徒有羨魚情。萬事付之釣。

程兆熊字孟飛。一字香南。儀徵人。書法虞永興。亦精大小篆八分書。間作寫生畫。每多逸品。

舟行偶作

村路日將夕。牛羊仍未歸。炊烟浮瓦濕。野鳥掠船飛。雨歇蟬吟樹。風多客換衣。三年不到此。景物尙依稀。

秋懷

秋意偶然覺。拮頤歎索居。難憑歸去夢。頻看寄來書。月冷搗衣石。風驚拍浪魚。生涯一杯酒。身世兩何如。

吳文奎號山褐老人。飲溪大族。移籍儀徵。詩境清奧古澁。皆唐人正軌。錢塘屬太鴻。稱其善造語。始驚其言。若臨絕壁斷壑。悵惘欲返。繼乃索得微徑。往往見幽葩奇卉。其刻削如孟郊。其誕幻如李賀。高吟冥搜。無不

如志。所著寒綠齋詩集四卷。

梨雲曲

蘆芽白。江南燕。河豚醜乳西施饌。東風吹露上梨花。閒綠搖谿柳一線。烘雲日碎光玲瓏。晚霞飛豔山腰紅。石泉有味心開蓬。卻話香春愁病翁。

自題寒綠齋

窠石玲瓏幽草風。枝枝梅葉凋秋紅。齋旁冷豔聚雅玩。粉蕉綠卷紗幃中。香絲欲沈月一角。思織密雲膩如髮。半瓶蟹眼風颼颼。浮瓊嫩陰茶色活。詩撥芒角腸轉枯。燈搖禿影吟魂孤。埋頭十載不出戶。書味橫腹來相呼。

聽徐太真撫琴

柳疎人靜草蟲吟。十指秋泉瀉碧潄。一陣冷光搖綠綺。野香吹月上蘿襟。

舟返大颿山秋心辭

樓船颿影鋪橫波。白雲擘天山全遮。水蕩落穗菱浮花。風勢一側旋平沙。荒岡老鴉啄牛角。疎墨抹林圖一幅。客箸嘗柳魚腥簇。饑官也解歸田錄。菰蒲十里飛清霜。自釣秋江膾寒玉。

湖上送春

湖邊漫老此華日。三月都扶酒病身。一市柳絲低斂翠。亂花風捲欲收春。

石鏡臺卽事

一卷溫磨散繡絨。澹香亂爨小青衫。狸鬚繞雪白光滿。蟾背吹絲素影銜。酒釀新詩開石甕。花分清夢滿江帆。請君試看芙蓉鏡。忍咒空屏喝石岳。

遙和同人尋秋江上草亭

秋憐寒鏡落芙蓉。獨擁香幃賦瑟居。藤架夾花幽蘚滑。竹籬吹葉冷煙疎。半帆江影雁飛後。一抹山痕簾捲初。輸與閒卿豁清臆。半篝漁火十車書。

秋餞辭答高鳳岡

昏林幾樹葉凋紅。野篆初銷泊岸風。櫓曳鄉愁飄白港。竿挑山色挂烏篷。涼雲欲斷鐘敲影。素景都澄水印空。賸得籬花香滿路。拂衣倦倚小蠻童。

秋權遊

柳渚雲梢畫幃閒。看花人在翠圍閒。帆分月魄挂一葉。秋色滿林寒半灣。光紅疊巘日將落。暝草城頭闕野雀。鏡平一權搖玻璃。影蕩樓臺綠霧薄。游魚空際漾鱗鱗。白鷺烟中飛漠漠。釣絲笠影滯生涯。半世瞢騰覩縷作。波寒雲黑煮菰蒲。艸縛霜黃烹郭索。扁舟一任西風吹。且踞樽前倒芳酌。

訪菊西庵

肯放黃花一度虛。竹籬帘裏酒人居。霜鬢盈握香莖澹。詩鬢半邊秋影疎。孤擘米鮮咀味外。蓮吹葉老蕩香初。西冷舊館覓然僻。來聽殘經僧悟予。

邗上晤錢塘金壽門

白社逢伊歌吹裏。攜遶寒林喝進卮。墨風颯颯十指篆。霜影蕭蕭兩鬢詩。賸有枯田畊研格。儘多幽夢遶禪基。淒清寺北梅花月。吟斷鐘聲人不知。時寓竹西天寧寺僧舍。

齋中古梅逢秋忽開數蕊喜而詠之

九月棄菊只愛梅。一枝清孕羅浮胎。半放半含泣香雨。兩分花氣飄玉壘。主人髮疎花亦疎。向檐晴簇涼雲枯。虛簾月影瘦不隔。水浸瓊齋秋夢孤。

程以位

字崑山。號豆田。江都人。少孤。後以哭母喪明。工書畫。最善白描人物。子壽康。壽齡。錄其遺詩爲豆田詩鈔一卷。

人日

歲序依然換。人情自覺新。六旬催白髮。五日駐青春。庭雨湔殘雪。村醪款舊賓。老來更頑鈍。慚愧值靈辰。

墨耕招集喜琴莊自黃山來

蛆浮寒夜酒腸饒。人集幽齋少長咸。恰好大蘇催擊鉢。明逢小宋落歸帆。燈前笑語詢黃海。身上烟嵐染素衫。莫訝新詩驚四座。山川靈氣入瑤函。

黃

裕

字北垞。歙人。居揚州。乾隆十七年。北垞年五十八。移籍儀徵。用趙嘏句白首江上名集。

范張二孝女詩

真州人。一年十三。一年十四。爲救父。一死于水。一死于火。

水火無情物。偏戕孝女身。可憐雙穉子。俱未及笄人。薄俗真堪挽。高風永不泯。曹娥江上淚。千古共含辛。

玉魚壓繡歌爲汪表弟礪巖作

失水老魚乾。鰓鯨泣。過黃河化爲玉。偶然掉尾到人間。猶帶千年土花綠。深閨藉汝壓繡牀。刺成常伴雙鴛鴦。不須銜向佳人口。也覺紅窻竟日涼。嗚乎世事多桑海。魏宮無復針神在。可憐淪落逐殘絲。金鳧銀雁須臾改。一朝攫取歸吾徒。壓繡不得翻壓書。硯池一勺潢汗水。還似脂箱粉盞無。

冬日尋鏡薺亭舊址不得。卽用郝信使鏡薺亭詩韻。

孤亭不見臨揚子。却憶當時放雁人。薜荔荒煙行已暮。桃花寒食幾回春。池枯尙引殘潮入。樹老空摧落葉頻。惆悵城東尋舊跡。北風吹起馬蹄塵。

諸葛菜

南陽佳蔬餽芳鄰。銅鼓聲中又一春。怪得艸廬當日願。英雄俱是灌園人。

己卯夏。館於江鶴亭苑卿街南別業。昔爲余門人程志泰舊居。老友陳玉几亦嘗寓此。今老友歿已一載。而余門人卒且十四年矣。時方編舊雨集。及玉几詩。因感而賦。

友人歿後黃墟在。弟子亡來絳帳空。老我不堪今昔淚。一齊彈與碧梧桐。東偏小室。有梧桐二樹。余曾下榻于此。

秋日與張子煦齋野蠶上人過資福方丈。主僧貢植。以香積款客。詩話竟日。復留坐。知止軒中。出退谷中。允爲息翁老友所書。心經小冊同觀。冊首有虛舟吏部玉筍小篆。欣賞不置。煦齋野蠶俱有詩。余于明晨之郡中。遂匆匆別去。歸日始補作詩。

久住張平子。新來湯惠休。同尋六朝寺。高話一林秋。野蕨分齋鉢。烟颿待客舟。瀕行觀小冊。又爲故人留。水香村墅。新闢藤花小逕。同盛引堂作。

水邊小逕喜新添。覓句行吟百不厭。翻笑青藤老居士。常扃書屋擁牙籤。

李兆吉 字雨村。甘泉人。乾隆戊午舉人。官湖南縣令。以善書名。

將之潤州東郭別友

河干分袂意遲遲。曾記同吟折柳詞。廿載壯懷消未盡。不堪又到落花時。

壽譽達 字升九。號菡坪。祖籍紹興。移隸江都。年九十餘。吟詠不絕。卒于乾隆癸丑。所著綠衫野屋詩鈔八卷。

過金壽門寓齋

繞膝書圍與不孤。十年聽雨老江湖。蕉衫樓笠陶宏景。贖水殘山劉伯芻。野艇釣依芳艸岸。夕陽吟指餅師爐。藤花落盡無人掃。門外松陰碧蘚鋪。

病起至東軒

拂面春風怯袷衣。籬邊青凍草芽微。梨花寂寂無人到。祇見空庭練雀飛。

王世球

字熙聞。號賀堂。甘泉優貢生。徵薦博學宏詞。自詩古文詞。及制藝南北曲。無不精善。所著有咏菴集。

遊香阜寺用東坡居士次守詮小詩韻

秋滿茱萸灣。風吹香阜寺。山門落葉多。颯颯隨行屨。僧窻見鴻影。自逐孤雲去。

指香居士席上送溫茂才鶴立歸吳興

高館張燈照離客。秋鴻夜叫西風急。西風江上芙蓉花。倩送歸舟好顏色。白露霏霏唱采蘋。涼秋應念江南春。那堪一盞南潯酒。勸爾南潯歸去人。

玉階怨

春月玉階暖。秋月玉階寒。多情謝明月。三十六年看。

橫塘行

妾家住橫塘。橫塘遶岸長。岸傍獨立思郎處。波冷萍開和影語。妾爲塘畔孤根草。郎作風中轉蓬老。蓬逐回颺雲際飛。草枯只與根相依。羅襦日暮風吹亂。驚起鴛鴦聚還散。一棲陌上綠楊枝。一宿橫塘淺水陂。

王世錦

字灑江。號一齋。甘泉人。世球之弟。歲貢生。徵薦博學宏詞。詩古文詞。與兄並稱。學者宗之。謂之甘泉二王。晚年爲謀士堂院長。嘗手訂詩文集若干卷。有哭兄百韻詩。爲世所重。

譯經禪院卽事用壁間東坡憶仇池石硯詩韻

蕭寺值新秋。滿階幽草綠。蓼花垂紅穗。眼前秋事足。堂上焦處士。鼾睡先坦腹。枯僧坐蒲團。苦吟額逾蹙。險韻疊東坡。詩中真頗牧。磊磊出奇峰。汪汪匯大瀆。詩成飲我酒。搗蔬切青玉。丈夫當雄飛。有時亦雌伏。或爲韓康藥。或爲君平卜。或放人天眼。光明燭幽谷。願言歸淨土。袞袞謝徵逐。偃鼠飲于河。滿腹足吾欲。酒酣同一笑。歸路迂且曲。矯首望青天。浮雲逝何速。

春仲同朱九次堂訪冒大葦原於僧舍留飲酒酣有作兼懷南徐李四琴夫

風吹河漢流無聲。一廬佛火迎人清。如臯才子竭來此。春釀小酌珍珠傾。廿載勝事歡相數。記否登壇建旗鼓。爾時勅敵推兩朱。君自如龍朱如虎。子家兄弟操戈鋌。四方號召多豪賢。海門李四尤翩翩。風流文雅疑神仙。其氣不可遏。光芒轟牛斗。拂袖生萬象。脫口落璠玕。文瀾欲挽蘇韓潮。高筵共吸阮劉酒。十年變幻紛相仍。那堪死生聚散兼沈升。舊雨三人復此聚。萍花春水開層層。指點豪狂恣評議。若個能分造物餘。千秋許與名山事。何當便與李生俱。攜來春江花月同歌呼。悲歡袞袞逐吾徒。酒酣珍重黃公壇。

送溫榮飛鶴立歸吳興

西風吹信渡揚子。雁字迴文疾如駛。芙蓉作紅柳作黃。邗江秋夢隨流水。破書老劍裝縱橫。吳山越水爭逢迎。布帆無恙渺然去。獨立斜陽空復情。

渡江

碧水吐晴霞。遠山銜落日。江山抒文藻。烘染成一色。忽然驟風發。粘天起蘆荻。長空作雷聲。怪峯離浪立。輕帆怖中流。衝波隨所適。漸覺風已平。徐觀日初出。人生有險夷。變幻安可測。不從艱難來。誰知周道直。

李敬修字惕原。號願齋。泰興歲貢生。著願齋詩藁四卷。

印節婦詩節婦張氏。農家女也。歸印氏。印亦農家子。世居泰西鄉江岸。田數畝。張內事翁。外與夫力作。晏如也。逾年印以疾亡。張哀毀不欲生。以翁老病。又有遺腹。不忍捐。及期生子。喜曰。印氏有後矣。

· 雍正壬子七月江漲。深沒者無算。張架木竹樹間。屬翁攜其子。而已在波濤震蕩中。保護什物。水退。田皆泥塗。嗷嗷乏食。以翁老子幼。不能存活為懼。自是益勤耕作。雖盛夏烈日。荷鋤田間。冬夜紡聲不絕。倦極坐而假寐。翁歿。衣食諸事。皆勉力為之。子長。娶一媳。適年得孫。而子又以疾亡。媳不類姑。不能留。張聽之去。復撫孫如子。艱難有加無已也。迨孫長。又與娶婦。而孫殊不肖。惰農業。張憤恨以終。年六十餘。乃作詩甲之。

吾鄉矜節烈。近迹隱江潯。危苦經三世。堅貞只一心。也知生趣少。偏覺舊情深。往事閒談及。令人淚滿襟。天道原無爽。榮枯運不同。秋風荒隻蝶。夜雨鬧孤鴻。集蓼人情外。含悽土壟中。茫茫增百感。搔首問蒼穹。

羅人傑號漢三。儀徵舉人。

題因樹樓詩

花下承顏處。天真樂事完。忽生風木恨。終斷綵衣歡。烏鳥情無盡。臯魚淚不乾。樓頭看日暮。冷落碧闌干。

湯應隆字鍾律。號魯山。寶應增生。以詩名。與同邑劉光彭。喬立方。喬大鈞。湯襄隆。劉玉麟。喬大鴻。稱敦素園七子。所著有借樹軒集。

懷任幼植大椿

極目楚陽路。重重烟樹林。美人不可見。秋水一何深。菱渚雨初墮。蓮塘風半陰。倘乘剡溪興。放櫂徑相尋。

送王海山表叔主教潁州

汝南舊是漢名都。梅雨絲絲客戒途。聲價定知推馬鄭。風流應復繼歐蘇。七星雙柳供吟嘯。水色山光入畫圖。我亦挂帆向吳會。一時離思滿江湖。時有吳中之行。

秋日同崔華林。唐果亭。喬楓亭。劉野塘。鷺洲。舍弟晴榭。過飲仙菴。聽鶴鋤羽士彈琴。

華山道士浮邱公。花關晝靜幽蒙茸。垂簾終日抱綠綺。園客絲挂龍門桐。一行再鼓發清響。泠泠十指生清風。成連刺船去千載。海上雲霧空濛濛。水仙遺調至今在。朱絃疏越含無窮。班姬斂怨泣秋扇。箕子行邁傷離宮。四座無言盡傾耳。曲所未識神相通。此時雨過碧天淨。林鳥不鳴高山空。流泉涓涓激幽壑。驚濤謾謾吹長松。瑤階聲唳別離鶴。玉宇影度孤飛鴻。始知箏瑟悅人耳。淫哇拉雜殊非工。日暮曲罷下山去。餘音嫋嫋隨疏鐘。登臚迴望白雲合。大江星月迴魚龍。

徐開綸字弟言。號鈍人。甘泉人。居邵伯鎮。任江西崇義縣尉。著有味書草堂詩集。花香留飲集。七夫人傳。

怨詞

容華已憔悴。留得腰肢小。庭院易黃昏。春漏不肯曉。羞月避涼帷。吟風怯素篠。夢裏驚啼痕。醒時記多少。

夜坐懷劉四

涼風生虛室。夜氣肅羣慮。舉頭山月上。萬竹忽流素。勞心未能閒。耿耿誰與訴。願念蓬蒿人。何因重把晤。願借西南風。吹夢海東去。海東隔層雲。夢裏難尋路。脈脈對芳樽。綠鬢已非故。

擬捉搦歌

園蒿不刈長成樹。倉粟不舂化爲土。女非男兒立門戶。爺娘不嗔兄弟怒。燒冶化銅鑄圓鏡。傾汞研鉛磨鏡淨。女兒照影惜雙鬢。年年說嫁娘無信。

晚舟

小雨時初霽。輕帆入暝烟。雲歸流水外。村隱落霞邊。野渡啼飢鳥。枯楊繫釣船。迷津何處問。身世兩茫然。贈許丈驚田

窮居求一友。如鳥得同聲。寡遇具真識。孤交無泛情。水雲天外意。松柏雪中盟。不似豪遊者。朝歡夕已更。春暮

花落稠新葉。亭虛樹有陰。燕肥低翼去。蜂暖抱鬚吟。酒癖因貧減。春愁入病深。柳絲侵短髮。惆悵此時心。寄黃春堂

一室孤吟自少歡。釣絲終日老湖干。村深茅屋住原僻。家遠故人思見難。春水客帆低野樹。晚烟沙鳥下

晴灘離情渺渺白雲際。注目長流獨倚欄。

汪漢倬

字大章。號箕臺。歙人。寄籍江都。長齋第三子。庠生。乾隆十一年。官刑部雲南司主事。晉廣東司員外郎。職。奉十三年。每決獄。九卿皆推平允。尋補山東糧道。署藩臬。屢斷疑獄。治河堤。才敏識卓。大中丞長。白郭公。稱爲上等好官。又于德州創建繁露書院。以修文事。署中設射圃。命運丁習射箕臺。早年工制藝。與涇縣鄭洪林。桐城方雨堂。江都郭秋浦齊名。詩多亡失。其姪對琴比部據。撮拾爲箕臺詩鈔一卷。

通州使院寄懷曉園大參。

判袂經旬久。新愁白髮生。汎舟同北役。驅馬獨南征。落日高陽里。秋風通潞城。相思不相見。孤館欲三更。

曹文運

字萬育。號蘇橋。一號蔚菴。通州諸生。著蘇橋詩藁一卷。

憶壯悔游太湖

青山兩點落平湖。仙履迷茫水上臯。力士彎弓射犀兕。美人飛劍斷鵝鷖。玉簫金管風飄忽。綠酒紅燈浦有無。遙望夫君不可卽。三閭搔首獨踟蹰。

幕中答沈確士先生見贈

康熙癸巳。胡宗師招集李翰熙。金門詔。王荃。顧光世。朱奕恂。曹世治。沈德潛。文運八人。赴幕。同校萬壽作人詩卷。

不將裘馬競翩翩。海內論交信有緣。才子八人叨末座。先生一騎許隨鞭。蓮花幕對南州榻。鸚鵡盃酣北海筵。因就澄江見詩士。那堪雲樹隔他年。

秦淮覽古

九華燈影烟初合。百轉簫聲日已斜。玉樹可憐搖落盡。更無人唱後庭花。

遊吳氏山林

山空人不見，隱隱白雲垂。亂竹誰分徑，疎花自記時。風來波動壁，客去鳥翻基。物外聯幽賞，摩看石上詩。

曹德岐字楚文·號姬山·通州諸生·有詩名·著四崖詩紳·

金陵懷古

金陵千古帝王家，空惹行人感物華。桃葉渡頭浮薤葉，雨花臺上落松花。微微帶雨鶯歌澀，故故翻風燕影斜。鐘落景陽春已暮，更誰妝粉鬪殘霞。

曹一蕭字寧一·號兩何·一號釣舫主人·通州人·以明經授徒于家·性情學問·山陽周白民·極稱服之·沒于乾隆辛卯六月·著望雪堂詩藁一卷·子星谷·字竹人·年已六十六矣·聞余徵詩·錄其先人自于野至兩何詩百首

·為曹氏一家言見寄·復題以七言律四首·附錄于此·不惜詩中有斷魂·百年愁思海雲昏·新聲亂索蛾眉笑·老宿嘗銜蠹簡寬·匠石功名推柱石·雷門鎖鑰在龍門·靜聽寒谷人吹律·草被春風朽亦蕃·碧海新傳鐵網開·珊瑚有幸上蘭臺·南山撥霧搜全豹·東閣機春掃落梅·士恨吳中身未死·人驚地下夢初回·校驪豈為傷流輩·振緒端應尙別裁·此日閑眸因相馬·前年雙耳為聽蛙·並教夢雨愁雲客·重問雕龍繡虎家·門戶不殊唐舊草·星河同上漢仙槎·何期沒世無稱後·華髮猶蒙一字加·白骨黃墟何第等·紅氈青簡賴平章·芟除惡艸根原薄·陶鑄良金義最長·才鬼於中多起色·懸壺此外半荒唐·重將玉尺量修短·喜極翻令淚滿裳·

見梅

白髮春不管，東風又今年。徘徊野水曲，忽到梅花前。香淡一林月，影斜半笠烟。孤韻卻似我，相對心翛然。

上竹西水亭

陰陰連水竹，曲曲過桑麻。亂石穿雲起，長橋出屋斜。萍開魚唼葉，樹動鳥銜花。不解亭西路，誰人問酒家。

閱

字棟亭。號拙叟。江都人。康熙乙未。隨叔父之姚安任所。著人瑞堂演遊日記詩一卷。棟川集一卷。回家偶錄一卷。又嘗往福建尤溪。著雙峯集一卷。

過黔陽縣

按黔陽。梁曰龍標。王昌齡貶龍標尉。李白寄詩。有聞道龍標過五溪之句。

不作龍標尉。春殘過五溪。故人魚字渺。新岸柳條低。雨潤山添翠。風和鳥緩啼。旅懷憑酒遣。一盞醉玻璃。

桐槽灘聞畫眉

夾岸青杉叫畫眉。一篙潭影漾清漪。盡情啼到烟深處。正是斜陽欲落時。

張

麋字九章。泰州人。

柳枝行

河堤自古鐵與石。近日河堤柳枝塞。前歲河工未告成。今年柳墻又頽行。官糧一石柳一束。三倍稱來猶不足。胥吏如狼橫索錢。催頭那顧人家哭。楊柳青青滿舊堤。連年斬盡不生稊。滿船載向河邊去。積久堆堆化作泥。君不見邵伯鎮南幾千戶。晨炊半是吳陵樹。

梅閔琇

字衛瞻。號沌齋。江都人。

奉懷梁五棻滇南

好在滇南幕。參軍正寂寥。雲山迷六詔。風壤隔三苗。客淚花時墮。鄉魂月夜消。從來無雁到。莫怪尺書遙。得五棻滇南書

憶遠昆明外，迢遙共望舒。秋風迴一雁，春水到雙魚。魂夢營餐飯，丁寧屬起居。祇應託懷抱，三歲意寧殊。

張

字敦六，江都人。工詩。能醫。卒年九十有三。

促織

王孫晉

字左公，實應人。

南閩

喧聞蟲類夥，促織最哀吟。五夜聲難斷，一庭秋已深。近牀迴客夢，傍月弔花陰。誰是忘情者，淒其總不禁。

久客欲歸去，翻愁行路難。極天圍萬嶺，平地落千灘。水立驚蛟鬪，風腥哭虎殘。悲歌烽火夕，流落恨儒冠。

陶開虞

字爾禪，號月蟠，通州盛實生。深于詩。著詩笈八卷。溯河吟若干卷。

劍池

池中劍影浸波平，銀漢沈沈一道橫。龍氣雨餘腥石窟，魚腸夜半化金精。題軒不見晁無咎，舊書劍池二字於此軒書甚

精品水誰爲李季卿，李以劍池爲第五泉。滬瀆來遊人去後，秦始皇自滬瀆來此。寒光猶見斗牛明。

鼓枻歌贈章素文

鳴禽入夏音正和，把酒臨風鼓枻歌。歌聲欲發水鷗起，年華暗度匆匆裏。寂寥歲擁一牀書，何不遨遊問山水。途窮羞咏北門詩，興來慣挾東山妓。人生行樂豈組紉，莫負東園桃與李。園中春色去若飛，魯戈誰

與挽斜暉。應徐文藻長金板。衛霍功名冷鐵衣。猶懷束髮輕時輩。曳玉鳴珂易警歎。未絲楊柳擬金門。初
藥芙蓉期玉埭。吁咄哉虬虎俟風雲。蹀躞竟與夙願背。王孫草色暗萋萋。大夫松枝徒薺薺。齊童既輟吟
秦娥亦斂佩。玉顏安得皆千霜。名山大業終無晦。為愛煙波此津逮。鼓枻而前饒勝槩。吾山在。吾水在。吾
友在。吾詩吾文吾舌在。

吳

均字公三。號梅查。江都人。老於詩。乾隆己丑。以詩藥就正於長洲沈歸愚宗伯。宗伯歎賞。以為
學人之詩。梅查長於敘述節孝事。鄉曲之行。頗賴以詩傳。格亦蒼古無枝葉。所著有青棠館詩集

梅查歌

吾家舊有酒器曰梅查。形似枯查。而實為梅
根也。每擊查引滿。陶然竟醉。遂以為號。

苔龍勁骨寒不裂。千年萬年飽霜雪。雷斧劈自懸厓巔。礪礪盤錯如屈鐵。旋螺結促紋松花。黑如點漆紅
丹砂。中空不用巧匠鑿。妙製天成貫月槎。葡萄鬱金無不可。碧山之器焉足偶。鑿空未許張騫乘。開筵宜
入逋仙手。當年創式自天水。翠芳園中汎清泚。宋理宗翠芳園御舟。名梅查。見湖船錄。金碧鋪張呵護多。繁華奚翅浮雲耳。何
如此物席上珍。拍浮酒國能長春。供用雖殊名則一。具體而微乃後身。酒具所貴樸而雅。傾金注玉胡為
者。樂天蓮子差可倫。東坡蕉葉堪同把。莫笑酸寒性骨堅。得酒元氣彌渾然。物我無間常周旋。醉酣作枕
供高眼。

陸宣公墓。枯柏重青。詩以紀事。

宣公輔政稱名臣。諫諍不憚批逆鱗。與元戡難勤贊助。轉危而安此一人。乾坤幾劫滄桑改。齊女門東古

墳在松楸羊虎已銷亡。枯柏杈柯數百載。聖代深嘉內相貞。勅修祠墓特褒旌。精靈耿耿不泯滅。香葉勃鬱看重生。公能上不負天子。八利六失標青史。卓哉高節何嶙峋。正氣貞操長不死。昔聞柏樹化桐王。宴宅又聞柏樹偃起漢帝陵。何如陸公墓上枯柏復蕃翳。雷霆輓戰蛟龍騰。柏兮千載耐歲寒。乃是公之忠義肝。柏兮鐵榦挺勁直。乃是公之貶死骨。趙裴遺臭公芬芳。小人枉自傾忠良。公之丹心炳日月。豈以柏之榮瘁爲低昂。物因人重物亦尊。諸葛廟前柏尙存。他年瞻拜定相識。百丈參天看黛色。

孝子篇。

孝子姓練氏。名昆。江都人。父病篤。服藥罔效。私剽臂肉。煎笋湯以進。父尋愈。孝子創甚。月餘遂卒。秦觀察述其事。爲徵詩表其奇孝云。

刲股救父疾。論者以爲愚。厥行愚則愚。人子誰克如。身爲父遺體。救父遑惜軀。身完父苟歿。雖生胡爲乎。所以練孝子。至死樂有餘。

江貞女守節詩。

江嗣塔女。許字許春生。

江氏有弱息。許字許家郎。未曾賦桃夭。忽遘危疾亡。女聞喪其天。哀痛摧中腸。上堂告父母。女命胡不臧。旣爲許郎配。從一誓不雙。喪髮詣夫家。舅姑拜高堂。生爲許氏婦。死作許氏孀。同室生不能。同穴死所望。夫家極貧窶。縫紉易黃梁。魂夢縱相通。不識葦砧龐。茹蘖已十載。艱辛歷冰霜。節婦已足欽。貞女倍堪傷。寄語采風者。亮節奏明光。

古鏡篇。

雷塘耕夫。得古鏡一枚。銘云。大業元年造。蓋隋宮鏡也。

盈盈一片秋空月。雲霧朦朧半邊缺。五色雙龍背上蟠。銘鐫大業何曾滅。阿摩當日幸迷樓。如花嬌嬪居上頭。瓊戶晨開金鏤鎖。珠簾齊上珊瑚鈎。明星熒熒寶奩啓。鏡闢新妝明鏡裏。塗黃那數漢宮嬌。寫翠休誇趙女美。掃天紅粉逞妖嬈。豈識春風夢易消。故園芳魂歸未得。玉鈎斜上長蓬蒿。綺羅灰劫經千古。皓齒明眸何處所。微物何爲未化塵。一朝耕出雷塘土。曾懸媚子照嬋娟。雨散雲收一惘然。陳宮難問樂昌事。蜀物猶存乾德年。好事傳觀勤拂拭。繁華瞥眼空相憶。祇合深宮豔質藏。豈期蔀屋農人得。古訓由來戒色荒。驕奢淫佚致傾亡。當時若以古爲鏡。何至楊花委路旁。

賈琴歌

琴爲宋乾道八年。孝宗賜謝安道物也。亡友洪進士達夫珍藏之。卒後嗣子夢岩賣供饘粥。因作詩傷之。琴背金字銘。爲朝陽風。

枯桐三尺何代造。摩挲識自宋孝廟。紋理庚庚古且樸。上方曾賜謝安道。朝陽之鳳錫嘉名。背鐫蠅頭金字銘。我友好事傾囊買。響泉韻磬難與京。花間置酒召琴侶。揜袖一彈復再鼓。引吭清嘯振丹山。炫彩九苞游洛浦。或鳴或舞向扶桑。鷓鴣環繞聲琅琅。碧梧高棲阿閣旁。百鳥不敢凌風翔。四座叫絕傾千觴。曲終什襲古錦囊。無何腹痛子敬死。琴在人亡宮變徵。親老家貧鬻諸市。令我見之淚如水。可憐誰恤任昉孤。日抱遺經空業儒。故舊眼前頗不乏。爲君重廣絕交書。

尋影園故址。弔明職方鄭公超宗。

園廢迷三影。林荒絕四鄰。空餘歌舞地。不見讌游人。獨力思戡亂。羣疑竟殺身。橫流滄海後。誰爲一露巾。

存園。家待御豹文先生別業。古梅千樹。花時宴客其中。今荒廢易主。

當年白簡直臣風。歸臥家山十畝宮。石徑生雲修竹裏。瑤臺無夜萬花中。梁空不見棲巢燕。事去何從認雪鴻。檀板金樽久銷歇。月華猶到小池東。

東園。喬逸齋先生別業。曹棟亭巖使。嘗寓於此。題詠甚夥。

卅年未訪古林廬。邗水名園總不如。無復清香飄鼎茗。空餘老翠落岩裾。岩際。裾木大十圍。荒池露冷枯荷雨。斷壁碑殘倒薤書。回首烟雲成小劫。重來那得不欷歔。

南莊。馬秋玉別業。

幽深林館枕江濶。門外村圍萬柳陰。伯仲風流花萼集。賓朋游賞月泉吟。連牀舊雨今誰聽。滿閣涼雲供我尋。最是灘聲易惆悵。泠泠猶似寫瑤琴。

西疇。方右將讀書處。

風期古澹老清狂。卜築幽棲隴畝旁。賦擬小園堪隱遯。經繙耒耜課農桑。再來求仲荒三徑。不見方干泣北邙。滿目蒼涼空徙倚。白華樹老冷斜陽。

過小玲瓏山館。追悼馬秋玉佩觴昆仲。并厲太鴻陳授衣江臯諸人。

廿年不到此。沐亭黃葉蒼苔客。再經卷帙飄零殘。二酉風流消歇億雙丁。名園異境生愁劇。老樹增圍似

舊青高會玉山人已盡。我來何處覓遺型。

偶於書麓中檢出丙子重九同王藪堂焦五斗沈江門金棕亭侍鸞川程維仲方萃友家學葺諸子集江家墩詩冊并圖屈指二十六年矣今會中諸友零落太半惟餘棕亭萃友學葺與余四人。不勝今昔存歿之感因賦一律題於左方。

猶記登高集酒顛。江家墩上暮春天。傷心汨沒詩文社。彈指存亡廿六年。舊事冥鴻涼雨外。生涯黃菊短籬邊。老夫今日開雙眼。忍讀清詞幾許篇。

朱

字老匏。江都布衣。素好苦吟。兼以窮老。故語多瘦削。寒韻偏人。其病臥詩云。卜葬憑詩友。書空作子孫。亦可哀矣。所爲詩六卷。既沒無復存者。其友人汪菴贈宏收集。刻爲臥秋草堂集一卷。

觀獵

邊海北風高。狂塵獵騎騷。仰穿天雨血。橫掠土無毛。羽括三稜弩。金裝百寶刀。豺狼期掃跡。前路指旌旄。縱合包原隰。從禽西復東。折翎傷鵠白。聯臂侈猩紅。趙發中山鼓。齊揚大國風。書生無主見。斑鬢欲從戎。堊燒遮巖谷。山靈亦震驚。揮旗嬌鳳舞。拔箭餓鷗鳴。烏濟先驅捷。伏飛要趺輕。先王隱微意。田獵寓觀兵。動地催田鼓。輕裝短後衣。獻緞郎主拜。撲虎健兒飛。毳帳金貂滿。霜霄玉兔肥。琵琶雜羌笛。歌吹夜中歸。

春泛

宿鶯生空翠。新晴一櫂開。柳絲纏燕鬢。花雨漲魚腮。遠浦邀長筵。深村覓舊醅。殷勤候明月。取醉就漁臺。

宿瓜渚

積雨投瓜渚。輕帆觸岸收。寒鴻隨夢遠。敗葉與身浮。歸思依吳榜。狂歌擊越甌。喜逢賢地主。沈醉作天遊。

秋夜詠懷

小圃荒人跡。中宵亦自安。水花秋太苦。山木老猶寒。浪跡青鞋易。躬耕赤土難。螭蛄如解我。隨月弔句闌。籌燈昏在壁。衰影伴孤身。冷榻不成夢。秋聲尋到人。鹿麕馴有舊。菱茨老嘗新。而我所思者。蕭條秋水濱。月節逢坏戶。無家只自傷。顛毛官柳禿。腰帶女蘿長。謀酒期沈醉。攤書任健忘。有懷虛老氏。何處託閨房。

冬日病起

數椽縣冷罄。衰鬢不堪搔。止酒興趣死。把書肩脊高。被僵渾似鐵。風勁劇於刀。老去兼貧病。寒花笑縵袍。

送楊已軍歸金陵

茱萸莖水舊時灣。自買新醪解客顏。一笛離亭紅豆曲。五更殘夢白門山。放狂恥作羊頭吏。善謔真成鵝舌蠻。記取青鞵踏江草。莫遲雙鯉報花關。

冬日偕諸子掃故人潘雪帆墓

斗酒僧廬憶往年。斷檠疎榻共昏烟。癡人死不干天祿。才子生當饜俸錢。藥物莫治心裏病。形骸能放老來顛。孤墳痛哭無家客。爾化莊生我杜鵑。

桂敬順

字翼昭·號介軒·秦興人·官山西
渾源州知州·有介軒詩鈔一卷·

次楊丈懿菴登繁峙舊城韻

仲宣兀兀感蓬飛。欲卻鄉愁計總非。臺麓星霜凋鬢影。女牆薜荔冷秋衣。吳鴻行斷菰蒲遠。代馬雄嘶苜蓿肥。我亦浪遊將十載。登高一度一思歸。

次石倉漁門昆仲中元日汎舟韻

伯仲神仙侶。維舟古郭西。潮連新漲闊。雲壓亂山低。僻徑稀樵客。閒僧灌菊畦。不須汎牛斗。花霧總堪迷。

次月田弟冬日重過金山韻

隔江燕子望中來。面面僧窗冷翠開。潭底龍依經鉢睡。雲巢鶴自海天迴。遙知候汲中冷水。定擬同登般若臺。記取舊遊將廿載。喜隨清夢破寒苔。

桂禮順

字簡菴·號月田·秦興人·官河東
鹽運使經歷·著有玉壺吟八卷·

江南曲

春水生綠波。春草江南路。江頭杜若香。所思在何許。捐玦期湘臯。解佩懷澧浦。惟願素心同。不敢怨遲暮。

晚過化城菴

信步招提境。悠然清道心。石橋流水靜。竹塢夕陽沈。落葉堆空砌。荒苔立野禽。扶筇歸路晚。明月上松林。

秋暮有懷

澤國冷漁蓑。蕭疎感芰荷。風高彭蠡雁。葉下洞庭波。秋氣悲如此。佳人遠奈何。相思勞悵望。衰草夕陽多。

周鳳鳴

字岐瑞。號桐村。江都諸生。盧學士文弼稱其詩入王孟之室。登錢劉之堂。所著齒香閣詩集一卷。

平山堂

太息仙翁去。高懷剩此間。遙持一樽酒。坐對隔江山。古壁龍蛇暗。僧房竹石閒。心知塵事遠。何必出人寰。

葛

振字嘯臺。號柳南。江都諸生。工制藝。志懷高潔。年八十。著有偶吟彙抄二卷。乾隆五十年間勒成。

蜀岡晚步

蜀岡迤邐接平疇。笠帽棕鞋恣野遊。芳草尙餘歌舞地。夕陽空結古今愁。泉融雪乳通巫峽。山染烟鬢鎖潤州。最是歸途饒逸興。銀蟾剛上柳梢頭。

葛

侄字松坪。振弟。甘泉秦綸錄。其兄弟之作。爲彙箋集二卷。

平山晚眺

遠峰挹翠大江曲。塔影倒壓千疇綠。翦碎半山一片雲。平岡勒石埋寒玉。萬松亭上月玲瓏。禪心驚破暮天鐘。一鞭搖烟去緩緩。歸鴉亂捲斜陽紅。

暮春過平山汪氏園

莫教愁病負春華。日暮名園興自賒。雨潤石根寒迸筍。風香巖半暖飛花。酒狂不必拘三雅。吟苦何須限八叉。卽此浮生能有幾。前溪明月一鉤斜。

田雲鶴

字輪長。號蓬壺居士。泰州人。太學生。嘗覽武夷仙霞之勝。詩思沈厚。著有金鏡集。

秋夜月同葉善百信步大寧西橋望德香閣并半園舊址。

薄雲如擘絮。孤月絕塵滓。年年悲秋客。又落秋風裏。吾家德香閣。窗戶照清泚。當時雁塔人。焚膏曾繼晷。半園背其北。聲伎逝如彼。醉石倒青苔。荒林匝斷堦。入望烟景迷。連邨灣一水。疎梵出破剝。柳岸無舟艤。今夕乃何夕。罾魚撥刺起。睡鴨驚我來。晚蒲結沙嘴。露下何淒淒。籬根明素蘂。笛借桓伊弄。樹留吳質倚。但看今北垞。何如昔甫里。逝將齊得喪。灑筆淡憂喜。

次韻王潛夫寄懷

瓊琚迢遞贈無訛。最喜聯吟羊與何。墜地人誰占夢蘊。著書君亦患才多。定中了悟漚浮水。世界繁華蟻聚柯。不信傳來牛渚客。枯槎容易到天河。

肯辭強敵託非夫。白雪裁成調不孤。生怕好春啼去也。曾甘長鋏咏歸乎。屠龍無用誇能手。狎鷺眞當署釣徒。莫悔前期易分手。論交終自兩心符。

經

綸字□□□□
優貢生。

懷鄭磊岩

丈夫落拓走蠻烟。涉險瀕危路幾千。書到梧州難計日。人歸邗水定何年。秋風已是拋鱸膾。寒雨何堪叫杜鵑。聞道少陵多縱飲。此身只合醉鄉眠。

贈張光岳

棲逸情懷寄郭東。出塵清韻少人同。故衫直爲囊書破。冷竈時因煮酒紅。常苦青眸無處著。何妨白首此身窮。時榮蔑視如遺土。綽有君平高尙風。

張曰恆

字南坪。號寶山。儀徵人。乾隆乙酉拔貢生。工書法。其詩擬古之作最多。著有南坪詩藥七卷。

北郭

驅車北郭外。北郭多墓田。白楊鳴悲風。野樹生寒烟。下有陳死人。冥然閉重泉。子孫盡凋散。狐狸穿穴眠。憶彼昔富貴。聲勢何赫炎。一朝棄塵土。血食曾不延。餒者悲莫聞。觀者徒泫然。所以君子營。不在石槨堅。生惟保明德。死貽後嗣賢。

江總宅

南都多舊第。江令最知名。長板雙橋合。青谿一水迎。仙臺迴騎杳。高樹晚鳩鳴。悵絕城東路。年年春草生。

方元鹿

字竹樓。歙人。寄籍儀徵。工繪蘭竹。與薛謫人爲詩友。著寒衾集一卷。

曩在秋聲館。見元人顧定之墨竹神品也。今歸內府。偶撫其意。因識以詩。
曉起坐紋窗。晴輝映竹影。遠近淡復濃。葉葉清風冷。落筆悄無言。秋聲已堪聽。

咏竹

修竹如君子。蕭疎聽最幽。偶分山後屋。或種水邊樓。避暑原宜夏。迎涼獨耐秋。平生有知己。戀戀是王猷。

范徵麟 字彬文。甘泉諸生。居北湖。乾隆癸丑卒。年五十。著有秋帆集十卷。

正月拜沈得中墓

寂寞荒山土一杯。靈和掩盡舊風流。超羣品格歸黃土。同穴團圓未白頭。春草自青魂已斷。暮雲空碧淚難收。不堪更憶寒窗事。舊雨殘燈總是愁。

焦 驪 字肩爲。江都武生。著詩二卷。

咏竝頭蓮

小盎芙蕖映日開。一枝相背共徘徊。趙家姊妹新承寵。同入昭陽殿裏來。

宮履基 字應乾。號坦菴。一字素軒。秦州人。乾隆庚辰舉人。知浙江常山縣。著有素軒集。

舟中次蒼桐軒送行元韻

抱琴又別海陵城。舟泊莫灣聽雨聲。二月春寒雙槳去。風吹香雪上孤檠。

陳 璨 字開緒·號控伺·秦州人·貢生
·著有控伺詩鈔·西湖遊草·

寄懷孫心山

老屋孤雲外·相思每斷魂·
簞瓢千古業·雞犬數家村·
秋水烟中渡·蘆花月裏門·
考槃幽意足·消息許誰論·

朱東啓 字曉先·號爽亭·秦州人·官雲南思南府知府·

倒馬巖

六丁鑿鴻荒·巨斧砮然缺·
始知茲山石·鋒鏑如積鐵·
首路窮躋攀·拭目驚恍忽·
羊腸挂天根·坦途猶百折·
行行入深箐·石勢向我嚙·
呼吸皆餘生·跬步得傾跌·
我馬忽長嘶·四蹄迸已裂·
咄哉李仙人·曾未經險絕·
長歌蜀道難·悲風生冽冽·
蜀道洵云難·試與茲山埒·

楊開鼎 字峙塘·一字玉坡·晚年號蘆竹居士·江都人·乾隆己未進士·官翰林院編修·擢御史·以直稱·巡視臺灣·任福建糧道·挂彈章·蒙恩起復·終湖南衡永郴桂道·生平交友重氣節·故人子弟貧乏·必有以濟之·後生寒士·尤見優禮·工八分書·所著有雙松堂詩存·

寄懷寧化黃瘦瓢

高徒傳札到揚州·飯顆山頭字字愁·
十六年醒春草夢·蓮花峯近雅歌樓·
聞有壺公不死藥·醉來墨瀋老頭皮·
傳神曾得愷之筆·展卷空吟摩詰詩·

汪 丙 字書石·號砥澗·甘泉諸生·原籍旌德·常遊黔中·老病歸·沒於漢陽途次·著述多散佚·

九日李東山中丞招集

山頭檠戟耀秋暉。野服能容興肯違。萬壑烟嵐筇一倚。百年節序鴈孤飛。林間蠻女樵紅葉。甕裏仙雲潑翠微。主客陶然猿鳥樂。一時相對總忘機。

汪

庚字大齡。號蘧舫。甘泉諸生。原籍旌德。

雒容道中

迢遞雒容道。孤征萬里情。山花沿路色。野鳥隔溪聲。破驛聞羊角。連塘達馬平。驚風兼密雨。何處弔龍城。

客感

萬里悲行役。寒砂沒馬蹄。雲飛三楚外。瘴合五蠻西。地僻迷山鬼。天荒叫野雞。十年愁客夢。回首自淒淒。

陳多福

字祝初。又字竹槎。江都諸生。

古琴爲藕船上人賦

上人雅愛樂。不事鍾魚音。終日不出戶。膝上橫素琴。素琴非時玩。漢晉難追尋。有字已磨滅。如銘且如箴。上人實貴之。珍重同南金。南金世恆有。古器良足欽。枯桐抱貞性。千載無塵侵。請師試一叩。妙響傳西林。對之躁氣獨。何獨消煩襟。

團連城

字荷白。號雪齋。儀徵廩生。

寄京口瘦生

曾話夕陽斜。相思兩路賒。海濱空倚杖。江界獨浮槎。貧室多飢鼠。寒林少宿鴉。米顛書畫舫。樽酒對梅花。

戴賢

字琴溪。揚州布衣。

鐵華巖感興

十日蘇臺客。青山半酒痕。尋僧舒白眼。待月幾黃昏。木落雲疑葉。山空石作門。鐵華巖畔立。望遠更消魂。

真州準提菴看返魂梅

冰魂久已屬飛仙。又返人間十幾年。花放高低香近月。枝橫新舊碧浮烟。卻教名士仍留韻。更與山僧續斷緣。老我不知還少否。鬢絲禪榻愧幽妍。

張在琦

字奇玉。號玉庭。江都布衣。

九日過顧深遠幽居

幽棲不可失。佳節此經過。地淨花原少。林疎山較多。交情重老大。風日惜晴和。一酌秋烟冥。蒼蒼冷薜蘿。

還家

三年心事但懷歸。及到歸來百事非。夕照倚門慈母老。春風問酒故人稀。鹿車未得桓君隱。菜粥空傳趙孝肥。何意天涯年少客。反勞款洽重依依。

古意

妾自住秦淮。郎自住揚子。燕鴈總無情。置妾秋風裏。秋風吹妾復吹郎。郎若臨風知妾涼。白蘋花落芙蓉老。紅板橋頭月似霜。待得風吹桃李樹。妾將盪槳揚州去。

過吳司馬林亭作

蛺蝶迴廊靜。梧桐小閣幽。酒濃翻引夢。歌豔獨生愁。作客彫雙鬢。懷人過一秋。簾鉤明月上。清興媿南樓。

羅

號老薑。如阜人。太學生。

自題菰蘆小築

天地本自寬。吾廬僻而小。數椽藏菰蘆。結構如窠鳥。太平雨露深。蒼翠森森繞。菰米食有餘。蘆葉炊不了。無事日吟哦。觸景詩成草。

己亥冬館

潦倒天涯客。荒涼海上村。草枯風更響。烟起日常昏。未晚先支榻。雖晴只閉門。故園何處是。思入暮雲屯。

七夕與寄舟上人分賦

孤雲野鶴碧天寬。翹首雙星只笑看。賈瘦原爲詩裏佛。阮貧不作酒中官。掃除竹葉開香逕。供取蓮花托露盤。聽話山棲林壑巧。可容乞我一枝安。

吳登鰲子御先·號立庵·高郵人·候選布政司經歷·

明月湖中望所遲客

朝遊明月湖。權歌揚清越。暮登鬱孤臺。弄此湖上月。月色伴遊人。山光留旅客。澄潭淨清瑩。秋水寒徹骨。美人期不來。芳醴空瑤席。浩蕩鏡中天。形影相娛悅。

酬族叔告期還鄉之作

人生天地等浮萍。萬里同遊彈指經。歲月催來頭易白。竹林相對眼偏青。秋風欲解沙邊纜。佳句先傳塞上聽。無限含情留不得。但思桑落醉離亭。

過班蘭山

三春欲盡尙嚴寒。馬滑冰堅行路難。自是趨庭忘險仄。一天風雪過班蘭。

范

字耕文·號雙桐·通州人·太學生·廩官四川梁山令·著有雙桐詩鈔一卷·

采桑詞

妾家長千里。生小羅敷媚。芙蓉睡起不梳頭。粉奩默寫鴛鴦字。日倚闌干阿母嘖。東家頻喚執筐人。匆匆白晝雙眉了。綠護輕雲不動塵。陌頭蹀躞驂紫。含顰小住濃陰裏。青絲宛轉桂枝鉤。廿四風柔擡不起。春花春草自年年。桃葉桃根獨惘然。莫學錢塘江上女。只將纖手采紅蓮。

管希寧

字幼明。號平原。江都人。本居西山。故又稱金牛山人。性情高潔。托業於醫。工畫。凡山水人物。無不精妙。年七十卒。著因鳴集。

月夜同葦村登平山堂

清輝隨興遠。月照古堂初。笑語入深杳。登臨橫太虛。泉聲出苑靜。松影下階徐。相與永今夕。仍留輞水居。

擬文五峯兼吳山秋晚圖

初日透林薄。晴光生遠流。水木弄餘態。淡寫吳山秋。嵐翠不知處。炊烟相與浮。鷺鷥明滅飛。點破青蘆洲。野田收稻梁。芰荷香可摘。橋過曲港深。林露曉猶滴。誰爲入畫人。我亦向山客。欲辦買山資。夢與秋山適。

紀夢

銀蟾吐光含素空。濃香露濕丹桂叢。雲和遙奏層樓中。丫髻雙童惱木公。不到深宵宴不終。白鹿飢走呼蒼龍。旌節前移鶴扇從。雲衣綵繡環瑋琮。瓊輶捧上迴天風。尋聲覓影追其踪。河轉路失波溶溶。非烟非露何溟濛。玉函不開詞不通。高寒竦骨心忡忡。天雞一聲驚海東。

淮海英靈集

季開生

字天中。號冠月。秦興人。順治丁亥進士。入翰林。擢禮科給事中。以建議謫遼左。年三十三卒。姜西溟宸英

撰被出關。庚子夏。世祖章皇帝下詔。將賜還余兄。而余兄不幸於己亥年已沒。世祖特旨允歸葬。徐乾學序略云

。往歲戊子。天中先生爲諸生。赴試金陵。邂逅桃葉渡上。與余兄弟暢論彌日。越六年。余偕季弟應試入京。先

生在禮垣。余執弟子禮修謁。道故極驢。未幾抵獄。猶論詩三百篇。離騷漢魏。源流升降。掀髯而談。略無愁慘

之色。笑語余曰。五湖烟水。與君共之耳。今大司馬宋公。時爲庶吉士。告假南還。余附其舟至滄州。流朱澹子

侍御至云。季給事長流遼左矣。余不自知涕之交頤也。向邑潘山人弱水。隨先生出塞。一日杖策還里。瞠目審視

。悲喜并集。先生寓書於余。娓娓數百言。戀庭幃。念朋好。言皆悽惻。非復部下赴獄時語。嗚呼。其可悲也已

。世祖皇帝。追念舊臣。下詔褒美。欲還蔡邕於朔方。徒馬融於右屯。而先生先已長逝矣。先生敦友誼。重意氣

。藹乎若春風。及與言國家大利害。必以寒蟬仗馬。捫舌喪心爲病。今先生名在天壤。垂休竹帛矣。己未六月余

過延令。先生之弟南宮。出遼左詩稿相示。距出關之歲。蓋二十五年。而先生之情興。固可想見。其卽事有云。

絕塞有山多北向。重邊無水不西歸。雞鳴夢訝參朝晚。烏哺心傷進膳違。哭李龍衰云。人間愁苦於先脫。天下艱

難誰共肩。送左大來先生葬云。未遂首邱須淺葬。好畱枯骨待恩波。先生雖遷謫。每飯不忘君父。而預知貫日之

虹。聖明終垂信諒。送左語遂成詩識。此余所展卷歎歎而不能已者也。暉格云。給諫奮死直諫。使江淮南北之民

而人不知也。

入西山善應寺

下山上山異草木。出山入山異天地。山空歷歷清泉聲。結引松風寫秋意。拄杖還登最上峰。雲抱巒迴壓

危寺。挂壁黃花冷笑人。苔封破碣何朝字。八十老僧不能揖。逢人猶話當年事。

酬須介繁

並舫滯江濱。天涯得比鄰。河山寬醉眼。風月受閒人。酒覺他鄉好。情憐久客真。但愁沈火夜。未慰倚閭親。

關前誌別

罪軀幸得主恩全。餞酒蕭條轉授鞭。奄普灘平魚陣淺。句離天闊雁行偏。不辭馬骨埋邊雪。敢惜牛衣臥塞烟。今日玉關無內外。臨歧握手莫潸然。

洗馬橋贈王三俠君

靈崖北下莽蕭蕭。舊是單于洗馬橋。野槿帖山垂白葉。番河歸海逆紅潮。共傳化日銷兵甲。不厭寒星送使輶。萬里天書自西出。吟鞭應歎斗牛遙。

尙陽堡卽事

新燒懸崖淨積莎。遠隨甲騎渡柴河。虎頭作客休投筆。雞肋從軍漫荷戈。骨肉書傳遼塞少。林泉話入故園多。邊城老將秋霜下。夜半聞笳起自歌。

草橋跨澗水鄰鄰。不厭羊裘把釣綸。每愧野人勤給米。久勞隣媪代炊薪。牀前見月家園夢。雪後聽鴻兄弟情。酒濁却憐詩興淺。三秋不敢憶鱸尊。

五雲長繞舊皇畿。萬里孤臣寄翠微。極塞有山多北向。重邊無水不西歸。雞鳴夢訝參朝晚。烏哺心傷進膳違。寧惜焚焚沙雁影。難隨霜月入關飛。

鑿冰十丈得泉歸。却望千峰白雪圍。海岸漁樵生計淺。天涯親舊過從稀。頑山入屋霜連枕。禿樹當門月上衣。窮旅不堪兒女怨。夜添松火敵寒威。

送左大來先生葬

重關不禁旅魂過。夢裏看君渡塞河。白日總悲生事少。黃泉翻羨故人多。荒臺啼鳥圍松柏。廢苑寒雲鎖薜蘿。未遂首邱須淺葬。好留枯骨待恩波。

遼陽道中

關連白草暮雲平。東望龍樓紫氣生。烽羽久停無夜哭。管絃將動有春耕。海潮仍洗殘兵壘。邊日曾窺七將營。隋堞唐宮皆寂寞。惟聞山杵夜虛鳴。

季振宜

字說兮。號滄葦。秦輿人。給諫開生弟。順治己亥進士。官監察御史。巡按山西鹽課。彈章數十上。以風節著名。著有靜思堂詩稿一卷。所藏宋板書。及影宋鈔本書。富備甲子海內。

送馮三硯祥

江北秋風生。江南秋水平。舟寒霜葉落。村靜露雞鳴。此去逢黃菊。相思寄綠橙。推篷殘月在。行李重前程。

滄州古刹

齒齒魚鱗泊客船。浮圖倒影水淵淵。嘶風老馬斜陽裏。茹菜窮僧古佛前。宦海于今非故我。情田何處問諸天。新聲一夜江南笛。落盡明霞月又圓。

贈白門丁繼之

夜夜金陵夢所思。君今猶是故棲枝。杯傳燭影人如玉。柳罨波光月似規。白髮遺民翻舊譜。烏衣年少唱新詩。繁華搖落秋無限。木老煙寒總不知。

石城大隱早忘機。今日相逢暫拂衣。一代風流能有幾。六朝煙月是耶非。當門瑟瑟波千尺。隔岸絲絲柳十圍。羨爾草堂真可戀。秋深雙燕繞梁飛。

夜夢亡兄書寄柩前用代酌酒

曠野獸錚錚。高山石嶮嶮。金風吹淅淅。白水流瀾瀾。河廣激長流。流急岸崩圯。見兄隔彼岸。欲就乏舟楫。遂有濟予者。亂流舟若駛。呼兄呼弟相見甚。相喜攜持各一手。分明見十指。顏色非平生。無復舊冠履。契闊豈多年。別離昨日爾。長跪問我兄。胡爲瘦至此。兄云汝不知。我今長已矣。形骸關塞外。日閉黃泉裏。青藤纏木棺。寒冰浸骨髓。隣寺聆鐘鼓。隔土藉荆杞。天遠難踰越。地老瞻帖屺。朋友宿草盡。爺孃四千里。耶喜精神健。孃食無甘旨。三妹又長逝。白髮將誰倚。汝嫂目失光。石英覓燕市。從來敬寡嫂。青鳥化童子。莫我兒飢寒。我兒方生齒。我聞淚下雨。長跪不能起。我欲有所啓。收淚復長跪。白馬真死友。弟曾無錢紙。遼東古戰場。賢愚屍積委。鬼強射虎儔。兄弱雕蟲士。一唱和者稀。筆硯雜弓矢。燐火連破冢。託足兄焉恃。兄云汝不知。夜臺無曉理。儉兒盜青氈。魂憑烏皮几。沽酒邀修文。冉冉荒煙水。欲行我自行。欲止我自止。

聖人復我官。旅櫬歸桑梓。所遺七八口。汝當速經紀。寄語掌史官。慎勿挂青史。我聞淚下雨。長跪但唯唯。唯唯更悽悽。得無我亦死。

病馬行

憶昔主人富且強。不愛金珠愛驢驕。金玉爲槽粟爲糧。親被銀鞍錦繡裝。東風三月試康莊。擎鷹牽狗逐秋霜。一匹當前萬匹降。主人大喜累舉觴。白旗黃巾起攘攘。戈矛劍戟進如牆。國恩應在此時償。戰血盈身戰未央。賊肉充餓血作漿。盲風黑雨勢猖狂。短兵急矢難隄防。尸橫原野尸不僵。賊亦愛馬挽馬韁。主人之恩何可忘。不傍仇讎傍豺狼。毛黃肉削落荒岡。高山之水流湯湯。萬折千盤聒夕陽。荒荒瘦影野月光。啾啾饑鳥啄背瘡。我願世人屠其腸。腸同鐵石當久藏。誰肯裹革埋沙場。買骨猶餘國士香。臨風遠憶燕昭王。黃金臺前日脚黃。

季公琦

字希韓。號方石。泰興人。侍御振宜弟。選拔貢生。

懷宋荔裳觀察蜀中

邗水駒驪惜別喧。燕京書到劇銷魂。聞君卻往魚鳧國。何客能忘謝豹村。宦轍千盤迴劍閣。詩心萬里繞江源。那堪故舊俱天末。放眼青山失酒樽。

重九後一日。仁山家弟約游湖亭。因懷天中滄葦兩兄。

重陽已負登高履。此日欣逢小陸招。節物林園多變態。湖山笑語尙今朝。倚樓風葉當杯墮。繞樹霜橙隔水搖。轉爲談深生涕淚。年來心事極蕭條。

季舜有

字闢山。秦興人。康熙戊午副榜貢生。官浙江嘉興府同知。

秋水

收拾詩囊上畫橈。秋光澹澹水迢迢。叢蒲隔岸新漁舍。疎柳西河舊板橋。沙石鷗眠清夢穩。煙波虹浸碧痕消。臨流欲渡暮雲合。何處西風起玉簫。

十八夜獨上石壇看月

銀波洗出玉霄清。月在花宮分外明。午夜幡幢飄客影。一秋風雨讓宵晴。雲邊鸞鶴棲瑤樹。海上神仙集玉京。華髮蕭蕭成小立。銀河縹緲想吹笙。

季載可

號吟四。泰州人。

送友

杖藜我獨悵臨歧。錢不能沽酒一卮。難後氣平多病日。牀頭金盡暮年時。斷橋細雨人初別。野浦銷魂櫂乍移。幾度離情戀帆尾。老來愁絕是生離。

謝良瑜

字鍾山。江都人。順治初卜築於棠湖之上。是爲畦園。著有畦園集四卷。

次答冒辟疆原韻

大雅存今日。高名重昔年。巢居開水繪。芳訊隔湖天。酒惜三分月。花飛十二絃。應知常繡佛。揮塵正悠然。

題江都舊令林青紀夢集後

讀罷悲歌淚滿巾。更憐遊子泣風塵。請將佞佛施僧具。移待天涯失路人。

夜起獨步霜月下

不待雞三唱。難禁漏四更。卷簾邀霽月。酌酒勸長庚。燈黯隣家夢。砧空永巷聲。夜闌愁不寐。霜氣逼衣輕。

張習孔 字念難·號黃嶽·歙縣籍·生于江都·順治己丑進士·任刑部郎中·山東督學僉事·所著有大易辨志二十四卷·禮弓問四卷·詒清堂集十六卷·雲谷臥餘二十八卷·

楚遊

愁絕黃荆峽。碎訇萬騎奔。拍天風雨疾。坼地電雷翻。急起防崖逼。驚呼隔浪喧。莫言瞿瀨險。只此足消魂。

氣殊昏曉變。西蜀隔秦中。翳樹天光黑。霾花霧影紅。猿愁千嶂雨。鳩嘯一江風。心激濤聲壯。悲吟眺碧空。

張師孔 字印宣·江都人·所著有柘園集歷候詩·

夜泊虎邱聞笛

小飲山塘酒。懸燈櫂更移。水亭吹笛處。霜月泊船時。隔浦漁煙合。還家客夢遲。西風吹不斷。竟夕起相思。

楊

籠 號不周山人·通州布衣·著有柳竹堂草一卷·

別離歎

楊柳桃李時，獨立春風裏。蝴蝶雙翩翩，豈直尋花喜。登樓望行人，行塵飛不已。

宮偉鏐

字紫陽，號紫懸，秦州人。前崇禎進士。官翰林院檢討。國朝兩以薦舉起用。授終養例辭歸。築春雨草堂於小西湖遺址。閉門著書。有春雨草堂集五十卷。以子夢仁貴。贈光祿大夫。

宿寶應李氏園亭

長堤湖水闊，客到草堂幽。檻外倪迂樹，窗前范蠡舟。晴鳩啼雨濕，海燕掠沙秋。落日平安道，渾忘汗漫游。

蔣

字前民，號蔣山，江都人。

雨後同史成江頭待月

龍吼滄江去，漁舟唱晚晴。浪空山吐影，虹見雨收聲。好待南徐月，清談北府兵。一襟風露冷，脈脈寄深情。

秋夜江城寄豫菴

雨歇晚鐘邊，秋燈照不眠。江喧殘月夜，雁矯欲霜天。磊落思游侶，蕭閒淪細泉。驚人應有句，會向竹西傳。

別王于一杜于皇先遠瓜渚不得到焦山

孤嶼望不遠，渺然煙霧青。漁舟牽世務，樵客向空明。鳥挾風歸樹，江流月到亭。異時應得上，處處記曾經。

婦愁

倉卒攜家竄，西風倚舊林。不堪寒信逼，莫怪婦愁深。村稻殘秋雨，隣衣急夜砧。江湖人竝笑，飄泊爾何心。

清涼山頂別于皇

招提上夕陽。別酒置崇岡。秋老孤帆色。人輕百戰場。江雲平楚岸。風葉減吳霜。來日空回首。思君獨渺茫。

朱

字界洵。寶應人。康熙丁丑進士。官諸暨知縣。

秋過射陽湖有感

淮水分流自北東。桑田汨汨浪花中。但看無數哀鴻影。不似當時牧犢風。捕蟹罾懸秋雨黑。採菱船剩夕陽紅。年年瓠子勞沈璧。鼃背何人奠大功。

李

字箕山。泰州人。

豫讓橋

豫讓橋頭落日黃。行人攬轡相徬徨。當年君讎未得報。至今悲風夜聞嘯。伏廁斬衣不憚死。祇爲受恩酬國士。自言欲愧二心人。猶說中行與范氏。可憐作事雖苦辛。魚文匕首終生塵。君頭久漆爲飲器。何惜亡臣一漆身。

賁

字黃禮。如臯人。

江亭東望

獨上江亭望故鄉。迷離煙樹晚蒼蒼。分明一水無多路。不見柴門見夕陽。

夏九紘字次功。江都人。

讀史選二

吳起求魯將。殘忍殺其妻。齧臂期卿相。母死竟不歸。骨肉薄如此。善將奚以爲。曾子與之絕。聖賢重綱維。建儲爲國本。丞相操其權。如何立胡亥。乃聽趙高言。斯欲固爵位。牽犬徒煩冤。天意急亡秦。生斯非偶然。

袁懋年字仙客。秦州人。

別姑執端子

攜手何堪秋月殘。郵亭相送意漫漫。歸時只恨江波闊。常向青山斷處看。

范國祐字汝申。號寒泉。通州人。國初時諸生。著有天庸齋集。

焦山

處士今何在。寒江澄太清。日從天際落。雲向水中生。靜對金山寺。遙臨鐵甕城。遺風高萬古。應識爲逃名。

花下對月

偶爾成佳夕。疎枝鬪淡粧。幽懷渺天際。逶迤落青霜。

許納階字元錫。如皋人。

道路擬山中

征衣羈旅寒。狂飈迴孤館。秋山響易悲。客子心難緩。迢迢萬里遊。誰與訴衷款。偃仰發浩歌。我心終憤懣。何如山中樂。寢食忘櫛盥。緬懷高尚士。圭組不欲纂。外物無由牽。蕭然耽疎懶。雲陰飛菌閣。日高衆鳥散。魴魚烹山廚。舉觴時放誕。得性且爲歡。惠風送絃管。胡爲塵鞅者。僕夫日云瘡。

魏

鞏字庭堅
江都人

同半禪登燕子磯

突兀臨江右。千年老樹斜。孤亭堪載酒。落木更聞笳。野艇依高岸。疎鐘散晚霞。共憐時已暮。不定是寒鴉。

于

瀚字穎士
江都人

遊靈谷寺夜雨

蕭寺白雲封。登臨十里松。深山餘野鳥。夜雨失蒼龍。人出寒濤落。僧歸白霧濃。此行意未盡。更欲到前峰。

夏洪基

字元開
高郵人

新城夜泊遇雨

停橈宿江澚。山靜暮潮平。估集臨溪市。漁吹隔岸燈。菰蘆聞一響。風雨欲三更。明日金陵道。煙波可問程。

卞善述

字耐菴
江都人

觀匡廬圖中彭澤縣有感

我思彭澤縣。昔日有陶潛。作吏人俱羨。折腰君獨嫌。事隨當日往。名與此山兼。獨坐披圖久。清風自入簾。

易

字田授。泰州人。

趙孝子

武鄉人。報父讎殺賊而死。

痛哭前朝事。傷心忠孝門。千秋爾父子。百戰此乾坤。井碧孤臣淚。山青烈士魂。旱狼重過處。慷慨向誰論。

黃師憲

字汪若。泰州人。

喜天濤兄白燕京旋里

舊好存棠棣。新詩愧竹林。但存今夕話。還是隔年心。露濕花枝重。燈昏戍火深。依依十日飲。愁絕塞垣吟。

張李鼎

字吾鼎。如臯人。

別二弟元昆

餘生真意外。驚訝汝重逢。萬語見時塞。三年離恨濃。淚隨分水嶺。愁壓幔亭峰。此去又南北。同時慘別容。

王文師

字鶴臯。江都人。拔貢生。康熙壬午。順天舉人。

曉行與野老閒話

繫馬垂楊下。閒過野老家。不須通姓字。且與話桑麻。隴霧驅晨犢。林煙散早鴉。行行衣履濕。殘月水西斜。

題高宮詹北墅

溪雲曲曲綠成陰。五畝園亭俗不侵。山色水光當畫靜。鶯啼燕語自春深。半窗竹影容高臥。一縷茶煙入醉吟。謝傅不須誇賭墅。幽情時復寄鳴琴。

王文樞

號澹喆。江都人。

野望

盪胸天宇闊。身在碧雲間。雨長雷塘水。煙開瓜步山。空林羣鳥亂。野渡一僧還。更愛蘆漪曲。漁家半掩關。

王文奎

字東宿。江都人。

自清涼山下至烏龍潭。復尋朱氏林亭。

登臨蠟阮屐。此生當幾兩。高墊折角巾。瘦捉枯藤杖。白門城北隅。菁葱疊巖嶂。禪關落松花。清磬淨諸妄。鳥道下雲竇。龍宮闕秋漲。曲沼漾衰蓮。臨溪屋如舫。短垣絡山腰。翠嶺橫衣桁。寧須問主人。看竹恣吟暢。斜暉淡遠峰。長江望滉漾。林臯墮宿羽。樵響答漁唱。何緣此結廬。人境渺塵坱。

初冬集家樓村殿。撰鴻柯草堂。

西崦斜陽墜晚紅。一庭寒影月如弓。早梅詩興追何遜。舊雨交情勝孔融。滅沒征鴻投暝色。參差殘菊剩秋風。坐閒亦有思歸客。雅取談諧入句中。

喬出塵

字雲漸。號疑菴。寶應人。

宿漁家

短笛西風裏。江深夜氣澄。荒天四面水。老屋半間燈。畱客行沽酒。呼兒代補罾。月明欣共醉。看徹碧層層。

早春過吳陵。晤冒辟疆。王象山。陸縣圃。

爲憶寒梅破薄煙。乘風載上海陵船。名園得到逢春色。舊雨論交失少年。詩社已空囊裏錦。酒旗莫負杖頭錢。搏沙歡聚真難得。肯放流光去眼前。

懷汪蛟門

水浸荒城板屋涼。門橫百道接蒼茫。無多翠竹圍寒日。賴有紅梨上早霜。別後忽驚時易改。秋來猶喜夢能長。請看庾亮樓頭月。正照雲堂薜荔牆。

喬

萊 字子靜。號石林。寶應人。康熙丁未進士。授中書。舉博學宏詞。授編修。歷官侍讀。朱竹垞尊墓表云。中書舍人。十一年。充順天鄉試同考官。以父老終養。尋丁憂。服除。補原官。十七年。舉博學宏詞。試一等。授編修。纂修明史。史館初設在東安門內。肩輿不得進。君體肥。嘗于步趨。騎驢出入。考稽典籍。會廣西平。補

行鄉試。奉命主考。稱得士。上再試詞臣。悅君作。曰。喬萊學問優長。文章古雅。命充日講官。知起居注。遷中允。纂修三朝典訓。進翰林侍講。再進侍讀。本朝漕運。沿明舊制。自淮入河。以達會通。河既失故道。從安東入海。清口日淤。淮泗泛濫。由洪澤以南諸河下注。治河使者。又開減水壩洩之。淮揚州縣七。蕩析離居。積事俱廢。天子覽臺臣奏。濬海口以瀉積水。遣使者相視。還報可。乃出帑金。命安徽按察使于成龍董其役。總督河務。都御史靳公輔上言。海口高于雲梯關五尺。疏海口。則引潮內侵。大不便。因請築隄東水。使高置二。壩于邵伯鎮南。高郵州城外。泄洪澤野盱天長之水俾入隄。自車邏鎮築橫隄一道。抵高郵。自州城東築大隄二。歷與化白駒場。至海口。束所洩之水入海。計需銀二百七十八萬有奇。請先給帑。而徐取償于田畝子粒綱鹽。又請設官二百七十餘員。擇才能者任之。疏入。天子下廷臣議。多是河臣言。適君入視直。上御乾清宮西煖閣。閣臣奏

事畢。上顧問君。濬海口事宜。君直前奏。河臣疏非是。上悅。曰。此爾一人意見邪。君對淮揚人所見。皆與臣同。翼日合戶科給事中劉國勳等十人持議。河臣之言。有四不可行。海口原有故道。第令塞者通之。淺者濬之。俾停蓄之水。悉趨于海。斯已耳。河臣議開大河。築長隄。隄在內地者。高丈六尺。河寬百五十丈。近海者。隄高一丈。河寬百八十丈。勢必壞隄。毀村落。掘圩墓。慘有不忍言者。不可行一。河臣之議。先築圍堰。用水車踏去堰內之水。取土築隄。不知臣鄉地卑。原無乾土。況積潦已久。一旦取土積水中。投諸深淵。工安得成。成亦易壞。不可行二。河臣欲以丈六之隄。束水一丈。是隄高於民間廬舍多矣。伏秋風雨驟至。勢必潰。潰而南。則邵伯以南皆爲魚鼈。潰而北。則高郵以北。靡有孑遺。即當未潰之時。儲水于屋廬之上。豈有安枕而臥者乎。不可行三。至于七州縣之田。向沒于水。今東河使高。田中之水。豈能倒流入河。不能入於河。即不能歸於海。淹沒之田。何日復出。不可行四。上是君言。河臣之議乃寢。未幾。君中書語罷歸。歸治廢園。曰縱棹園。巖石疏池。刺小船往來。讀易其中。著易俟二十卷。縣志二十卷。詩文集若干卷。三十三年春。有旨召君入京師居住。人疑上意且不測。既至。初不督過。君鍵戶不接見賓客。讀易著書如常時。居數月。病作。遂不起。嗚呼。古之進言者。不必皆言官也。工執藝事。亦可以諫。諫而不入。則罪浮於有言責者。自唐宋元明以來。詞臣之以言獲罪者。初矣。或死于戍所。或斃于獄。或殞于杖下。論世者靈傷焉。君遭遇盛時。片言動聖主之聽。鄉黨之患既釋。返多服而退。可不謂榮焉。方其再奉召留之京。安知不別有任使。特不幸而君死爾。表諸墓。後之以詞臣進言者。勿援君以爲戒而不善乎。漁洋王壬正云。門人編修喬君子靜。以康熙二十年冬典粵試。往返半歲。有詩若干。編爲一通。自洞庭瀟湘南嶽九疑。以至零陵桂林諸名蹟。犁然皆具。而其詩又奇秀峭拔。與其山川相似。至於摩崖碑黨籍碑數篇。於前代興亡。人才消長之際。尤三致意焉。非僅侈登臨遊觀之美已也。

確山道中

中州天下腹。厥田異斥鹵。如何南汝間。千里餘曠土。道詢九十翁。涕出語未吐。流寇昔煽亂。中原競擊鼓。殺戮兼流亡。千百存四五。村落人絕稀。城市屋可數。荒山相經亘。白日仗弓弩。余意殊不然。汝等逢聖主。賜租更發粟。修文況偃武。牛種亦易致。旱潦非所苦。休養四十年。胡不治場圃。老翁淚縱橫。斯理公未覩。戶少徭未息。民貧吏如虎。居者不可留。缺者詎可補。如欲起瘡痍。何能逢卓魯。聞言三歎息。誰其任州府。

山行雜詩

自明港驛
至應山縣

馳驅信陽道。岡巒吁可怪。糾互蛟螭蟠。峭削天地隘。凹凸相起伏。百里一千態。豺虎穴其中。早行客所戒。梯雲睇嶙峋。臨澗俯澎湃。既下又復上。人困馬亦憊。

過應山縣弔楊大洪先生

嗚呼有明神宗之季。國隴隴。光宗繼之更短折。維時先生官給事。顧命乃與大臣列。防微肩鉅定大計。選侍移宮一朝決。再起中丞赴雙闕。大柄已被閹人竊。乾兒義孫滿廟廊。二十四罪憤所切。赤縣爭高宦者祠。彤廷遍染忠臣血。詎有婪賊楊大洪。舍人寧死心如鐵。或言漢之廚顧潔其名。唐之牛李營其穴。宋之蜀洛明東林。黨禍紛紛蹈覆轍。封疆已被門戶誤。遂譏先生太激烈。君子不與小人爭。張禹孔光更何別。君子豈能禍國家。口爲黨人正氣絕。嗚呼正氣絕國乃滅。

港口驛

王程有常期。勞瘁孰敢憚。繫馬港口驛。維時日已宴。寒流咽亂石。老樹號高岸。伐竹製郵亭。賊退民亦散。徒旅晚苦飢。竈冷不可爨。黑雲蔽空來。仰視蒼厓斷。四面雨兼風。不寐夜方半。山荒豺虎驕。頗以身爲患。

雲溪驛

溼雲紛紛來。出岫疾如箭。分明膚寸間。俄頃千崖遍。早行過雲溪。雪花大如片。煙靄時淺深。林巒遞隱見。

蒼茫萬仞山。劈面不可辨。晨曦翳復吐。峩峩垂一線。平生山水懷。對此心所羨。不逢風雨交。烏能窮其變。
望衡岳

衡山之峰七十二。峩峩祝融尤崢嶸。我欲杖策躡其頂。屐齒遍踏青芙蓉。攀蘿晚宿上封寺。夜觀日出扶桑東。更探巖洞溝坪谷。窮搜冥索尋仙蹤。神之瑤草縱採摘。連根徑拔千年松。偃仰欲共怪石語。盤折況有飛泉逢。致身福地妙難述。那復塵事填心胸。嚴程未許三日住。又遭巖壑雲雷封。湘流九面分向背。但見面面空翠摩蒼穹。

鑊背

飛瀑懸崖下。中流疊石奇。孤峰連楚粵。二水劃湘灘。越嶠成渠久。戈船下瀨遲。只今舟楫利。還祀伏波祠。
靈渠

史祿穿渠後。經過利涉輕。舟行秦嶺隘。水入桂江平。象峒澄潭黑。龍湫毒霧腥。如何憂越嶠。不念隴頭耕。
獨秀峰

孤峰拔地起。峻極罕其匹。延緣無坡阜。上下乃如一。高疑祝融來。峭如巨靈劈。技癢上絕頂。扶策不自必。陟趾衣積潤。及椒足增疾。野雲來盪胸。懸磴時齧膝。頻休晷過午。履危畏及戍。力疲勇再鼓。躡巔寒更慄。蒼茫風日殊。歷亂林巒出。陡厭寰區卑。突喜障礙失。遠近兼巨細。一覽總能畢。昔在藩邸時。勝事土人悉。

池受嵐光烘翠落丹樓溢亭榭既蜿蜒竹木亦蒙密陰晴有殊態延賞無暇日繁華三百載一朝遂蕭瑟
既往勿更悲不游良可嫉到此方自知吾言難盡述

龍隱洞觀元祐黨籍碑

維天不祚宋黨禍中清流蔡氏竊威柄竄逐各遠州嗟彼冢中骨追論苦未休勒石端禮門因之遍遐陬
我來龍隱洞蒼壁工雕鏤大書曰黨籍正人一網收如何執國政偏與君子讎仗此一片石遂欲欺千秋
溫公潞公輩芳名無其儔餘官名未著翻借殘碑留誰知鉤黨禍遂貽宗社憂二帝竟北狩白骨埋荒邱
雨後游虞山出韶音洞觀立魚峰因過明月洞

連朝苦風雨厓壑不可辨茲辰漏霽光乘興尋翠巘峩峩虞山巔雲駁垂一線澄潭當洞門對之良可戀
古柏且千尋青山兼四面一峰最陡絕到此亦僅見形象如立魚辨色似染茜更探明月洞履危目增眩
溼雲去復來諸峰倏然變

宿湘山寺

朝爲湘山游暮投湘山宿湘山邃以幽古寺依山麓殿納千崖青門受一川綠絕壁瞰奔川空翠浮蒼玉
春山夜雨多寒泉貫喬木粵嶺富奇峰勝絕茲山獨維唐會昌時老佛此結屋只今妙明塔遺蛻猶在目
寺中多精舍幽砌散花竹編箐劃峰頭接竹引泉脈翻類疊石爲枕簟伴巖谷

田漪亭學使留宿秦淮水閣。

帆落龍江問使君。渡連桃葉浪生紋。兩年但飲江南水。萬里空攜嶺上雲。旋撥舊醅香細細。乍來新月白紛紛。湘中巖壑詩難寫。翦燭西窗一榻分。

自粵西歸過里門

滿院濃陰待我歸。草堂無恙帶殘暉。入門乍喜松杉大。把酒深憐故舊稀。嬾慢最宜麋鹿性。疎狂欲製芟荷衣。園翁谿叟論交好。且莫深關白板扉。

口占留別

頻年送客來荒寺。每望南雲卽黯然。今日臨風歌折柳。鄉心先到射湖邊。

喬崇烈

字學齋。寶應人。榮子。康熙丙戌進士。官翰林院庶吉士。善書。著有學齋詩集四卷。

呈于公成龍

維帝建極洪化成。天下刑措歌由庚。惟河不治娛蛟鯨。山鹽江泰高寶興。帝尤念之心怵怵。歲蠲歲賑恩莫京。海口不濬民不生。我公銜命來東瀛。治河使某窮心兵。曰田可奪民可隄。如虎負嵎孰敢撓。公埒其鬚人爲驚。兩議勅下詢九卿。僉曰河使議莫更。乃召面折聲如鑛。明日帝復咨殿楹。與九卿議還同聲。家公珥筆殊惇惇。十萬不值鴻毛輕。會帝顧問乃摠誠。四不可議文崢嶸。河使語塞雙目瞠。詔下卒如公議。

行。到今比戶炊香秬。公治畿輔除強勅。莊頭什伯人猙獰。小者搏擊大者烹。執法不屈稱公明。豺狼竄伏周道清。產蝗閉口皆南征。農民千倉萬箱盈。公飯脫粟蔬蔓菁。詔加少保彰殊榮。曰都曰俞一德慶。賢奸一一咨公評。黜陟自此民愜情。南臺拜命帝鑑衡。天下共慶君子亨。嘉謨入告銷未萌。衰職無闕廷無爭。拔茅盡得蘭與蘅。一時大吏羅國楨。貪墨或化爲廉貞。婦樂其織農勸耕。魴魚撥刺尾不頰。東南餘孽騰陰精。隄防歲決憂聖明。帝曰欽哉汝往營。賜正一品頓地紘。南天父老襁負迎。可憐七載穿雙睛。乃今始得瞻三旌。安瀾從此休編氓。豈惟賤子依幃幘。四隩旣宅水旣平。鹽梅在鼎需和羹。

絕句七首

陂塘波淼森。人家放鵝鴨。翩然鷺與鷗。飛來忽相雜。
滿船載鷓鴣。矯首張兩翼。得魚旋與人。終日有德色。
田頭有苦草。子黑大如薏。與猶頗同調。歲凶僧充食。
牧童艸兩角。歸路正斜暉。不解弄橫笛。卷葉時一吹。
深林護茅菴。野僧疎逢迎。與客共飯罷。起作叱牛聲。
種蔬家有畦。野人當肥炙。一摘與再摘。不知市上價。
野艇長于人。一篙力自優。出門無數里。不用有篷舟。

惜別謠送文子之白下。

波搖搖。風刁刁。蒲帆欲挂檣。烏驕。白田。地名柳暗亂鶯語。把酒酌君心鬱陶。春樓夜掩秦淮雨。桃葉人歸

隔煙浦。玉簫細泛璧月明。留照鷓鴣拍雙羽。時文子將納姬。

平北詩十二章

皇帝建極。九有章平。民物安阜。在古莫京。效天法地。大德圖生。久於其道。天下化成。維西北鄙。平沙浩浩。乃有狂童。分罔安阜。厥臂連螳。厥吻鼓蚤。往往陸梁。棘我周道。緊彼蠢戚。莫雞豬如。再諭再宥。歸命則虛。皇帝赫怒。曰此當鋤。爰勅六師。秣馬攻車。朱旗爛空。白羽森月。士合七萃。糧踰萬軌。飯初亞陳。程三十息。烏狎蟲馴。共殄檣杙。時維二月。昆彙含春。迎鸞草長。噴玉泉新。皇帝睿慮。不測惟神。剖巢薰穴。智以成仁。譬以瀛波。用澆殘燭。譬以衝風。用震枯蔕。鼠竄魚奔。于陸于壑。京觀斯崇。凱歌斯樂。皇帝曰吁。渠魁未殲。毋使滋蔓。逮此勾尖。霜青露白。弓勁戈鋌。翦彼餘孽。安我庶黔。虎穴既破。虎子斯獲。天稽其誅。寇喪其魄。業業者俘。鱗鱗者馘。厥角若崩。一隅成格。獬豸大困。有尾搖龍。明年之春。城築受降。依依楊柳。帙帙旗幢。皇帝臨之。威與德雙。聿修干羽。亦除戎器。賊遠聾知。惕然阻悻。懷孔邇仁。畏割正義。窮巖仰藥。既焚既棄。

西北既定。覆冒一天。銷鋒鑄鏑。億萬斯年。烽堠無火。亭障息肩。我春我秋。爾織爾田。赫兮武功。休哉文德。璇籙無疆。鳳符罔極。自西自東。自南自北。悉主悉臣。惟天之則。

玉帶生歌

端州石族歷唐宋。逮今四海爭琢磨。玉帶生出尤矯矯。大名欲竝山巍峩。廬陵正氣塞天地。譬經日月行江河。當時與生共几席。晞髮老子從切劘。指南悲憤吟嘯苦。霜天雨夜陪哀哦。水澤心堅名肇錫。象邈蟲跡如星羅。豈知生意盡陽九。台星墮地愁銅駝。成仁取義節太烈。勞生忠孝真無過。文山有忠孝太勞生句西臺慟絕

朱鳥逝。竹石擊碎雙滂沱。冬青更老汐社散。淒淒塵壙行蹉跎。抱遺老人老好事。延之上座頻摩挲。古語萬變鑄鐵體。秋聲一律盤雲阿。鼓鼙動地失滄海。富春晦跡依煙螺。李詩黃記惜烏有。玉筍張憲爲補歌。張之者誰朱孟辯。釋文細字音無譌。是時至正未改步。顛春試墨春風和。安車晚節趣召往。禮文史統親安那。歸全記就九華隔。人間流落還媿媿。吁嗟生遇盡坎壈。切火幾見人稱戈。雖與諸公發奇思。大都感慨兼譏訶。何當亟赴宋公幕。滄浪亭畔委以佗。春陵大篇助保障。花鳥風月仍婆娑。

二月六日查夏重見訪與樓村介夫飲梅花下用東坡雨中看牡丹韻

天明喜君至。問婦有酒無。走覓城東春。梅萼如貫珠。是中有佳句。落紙愁毛膚。惜哉此筆弱。憑君爲我扶。日日此獨來。水影憐橫枝。那計一樽酒。詩老來同持。疎疎未開半。灼灼行及時。高吟坐溪壑。浩蕩添春姿。

重修二烈士祠。陳容藏洪

賢者生亂世。於義各有取。寧以小大故。翻令澳仰俯。吁嗟子源公。酸棗之盟主。雍邱痛莫救。姦威憤所覩。王室誰則扶。勁節吾自樹。陳君激意氣。左右羞見數。遇害遂同日。流芳亦終古。吾鄉久崇祀。穹堂赫章甫。剝壁足煤網。飄瓦幾風雨。修復賴不替。王公阮亭與張父晉子。旛旗風獵獵。鬚眉只僕僕。庶幾祠下人。瞻回識儀矩。

西峰草堂圖

屋角山偃常山蛇。門前樹長迴風鴉。千尋塔拱一區宅。二頃地種五色瓜。先生嗜古如嗜痂。生逢堯舜追盤媧。丁年出門老年返。足跡已遍天之涯。詩朋酒伴多如麻。漁洋山人呼同車。三蕉已醉雪堂酒。七椀數具玉川茶。論風辨雅嚴淫哇。瓣香敬祝青蓮花。把筆欲追浣花杜。下亦未失爲劉叉。手握一圖勤耕畬。竹籬茅舍山人家。山光塔影日夕嘉。形神供養饒煙霞。我昔過之逢侯芭。二十年別歌蒼葭。今年握手歡莫加。接羅倒著山月斜。身世根柢如浮槎。草堂已辦餘何嗟。白頭自幸太平老。戶外肯問官蝦蟆。

喬崇修。字介夫。號念堂。晚號固翁。寶應人。萊第三子。雍正元年以學行聞于朝。與漳浦蔡世遠同邑。王懋竑同召見。授銅陵縣教諭。歲餘以疾歸。工楷法。精隸書。著有陶園集。

客示縱權園詩六十二首。賦和答之。

姜葦間·潘稼堂·秀句豔春山。朱曝書亭·陸須雲閣·湯仁和少宰·查他山編修·亦扣關。壁疊珠聯無限好。砌花汀草幾

時閒。

濡毫欲和一篇難。輸爾風迴海上瀾。恰似龍門高氏本。唐晉四五卷中看。

高廷禮選唐詩四五兩卷。皆六十二首。

除夕次韻懷樓村

殘臘真同赴壑蛇。小除纔駐短轅車。

前一夕始回自懷州。

暑饒清況羅鄉味。雪冰

去聲。

寒枝釀物華。酒到較遲憐漸

老。客遊常慣卹思家。驚心二十年前夢。若箇同悲子後花。

癸酉除夕。與樓村同客京師。誦唐人雪向寅前凍。花從子後春一篇。悲歌竟夕。

喬

字元溪。號斯齋。寶應人。萊孫。官夔州知府。工繪事。有詩集一卷。

灑西草堂坐月

七月十三夜。蟾蜍屋角東。四山皆蟋蟀。一院祇梧桐。不問來何地。偏宜著此翁。披衣清露下。獨坐愛秋空。

嘉州

山月寒無翳。江流夜有聲。泊船漁火出。隔岸寺鐘鳴。不少新知在。其如舊感生。緬懷岑刺史。有夢亦應清。

五月二十五日。初食荔枝。

絳衣仙子傳君謨。江鱸玉柱聞東坡。古來詩人爭爲口。老饕不惜成詩歌。笑我四十生江左。夢裏流涎三百顆。輕紅手擘齒牙香。芳樹炎雲駢實火。蜀產知名嘉興涪。五月江上堪停舟。香山賦詠更不少。前路欲近忠州樓。元紅一品疊疊熟。小撻筠籃生計足。何須定作嶺南人。愛此人家好風俗。百年老樹真可誇。楊

梅之葉盧橘花。人間果食此爲最。麤材棗栗僉梨楂。美味嘗新不輕得。使我詩情滿胸臆。紅紗卷袖玉肌肥。按譜從參好香色。

喬

字慕韓。號劍溪。又號寬寬老人。崇修季子。太學生。少以詩名江淮間。與沈歸愚。沈敬亭。方宜田交善。客游山西。爲猗氏書院山長。著有小獨秀齋詩。窺園吟藁。三晉遊草。夕秀軒詩鈔。惜餘存藁。劍溪文略。劍溪說詩二編。杜詩義法。詩隱記。古詩約選。王孟韋柳詩評。藝林雜錄若干種。

過泰山巨上人蘭若得陰字

涼颺肅晴野。清磬隔前林。古寺行人少。寒山落葉深。孤筇隨竹影。一徑入蘿陰。漸覺禪居近。空香引道心。

嘉禾道中

扁舟入於越。回首望勾吳。草樹裴休宅。風煙范蠡湖。漁歌爭晚渡。桑婦有蠶租。舊事滄波逝。何人識霸圖。

寄查三宣門

薊門分手悵何如。各指雲山引席車。千里相思難命駕。七年離別少來書。忽聞邗上停孤棹。可得湖干訪敝廬。先世交游文藻在。畫川林木已蕭疎。畫川。卽縱棹園。先大父侍讀公別業。初白查浦諸先生吟賞地也。

贈方五丈扶南

一生不負太平春。四海飄蕭任此身。宿草遍生聞笛處。瓣香終在曝書人。詩篇驥子多能誦。夢寐鴿原老更真。見說艱難孟門道。不曾覆轍也傷神。

木瀆章重宅曉起。從沈尙書放舟至光福鎮。

春鶯拂曙啼。春棹落波齊。日照萬花谷。人行香水溪。風光沿岸轉。嵐影壓船低。泊處非投止。聯裾更向西。

題貞女胡氏韞玉手錄尙書并蔡注後

尙書言治道。曩出女子口。又經女子獻。今藉女子手。一解女手錄尙書。嗣子讀全未。今文古文中。一掬貞

姑淚。二解二萬七千字。唐國子學石經尙書二萬七千一百三十四字。夾注備錄之。彤管不辦此。用遣霜閨悲。三解悲亦不可弭。字

亦不可滅。藏弄得其人。於焉昭峻節。四解

喬大鈞字秉之。號荔江。寶應人。增生。著有聽雨草堂集。

寄山甫大梁道中

蕭瑟秋云暮。懷人獨放歌。涼風吹白草。落日渡黃河。山勢望中盡。河聲空外多。平生壯遊興。此際問如何。

冬夜有懷湯鍾律毗陵

北風吹雁過。一夜起哀音。之子渺何處。相思空此心。寒雲低不散。落木迴無陰。可有還鄉夢。門閭望正深。

喬仙伊字一山。寶應人。著有洛浦僅存彙一卷。

送劉子芟之河西務

同是天涯客。何堪手更分。石橋人已去。流水夜還聞。羸馬嘶燕月。征鴻隔楚雲。欲歸歸未得。一倍惜離羣。

喬方立

字守之，號楓亭，寶應人。諸生，著有花雨香齋集。

送別湯鍾律

在家勸君出，臨別還沾巾。沾巾夫如何，念子行依人。寒風厲窮陰，白日暗清晨。揮手卽天涯，何必越與秦。我欲從子遊，堂上有老親。執手重徬徨，氣結不得申。那無片言贈，恐君生悲辛。努力慎自愛，毋爲歎沈淪。

中秋前一日梁谿舟次

寂寂孤篷裏，蕭蕭古渡頭。亂山黃葉寺，微雨白蘋洲。忽聽吳娘曲，遙憐水閣秋。飄零思故國，無計却離憂。

袁江旅舍懷金春田吳江

花落滿魚缸，風流憶海邦。暮雲迷楚岫，春水下吳江。歲月驚蓬梗，山川阻客艙。猶思石城夜，聽雨話蘭窗。

郭元鈞

字子宮，號雙邨，江都諸生。康熙己卯，南巡獻詩，奉旨取入纂修館，預修佩文韻府。又奏請編輯全金詩，授中書科中書。學博思深，詩筆奇險。商邱宋牧仲舉，稱爲異才。著拙適軒集四卷，一鶴菴集五卷，牛鳴雙

邨集若干卷。

方實邨香譜閣試碧海晴霞酒

我有閒心似春雨，君開妙醞名晴霞。二者相逢忽有得，駛駖一吸千觥花。霽雲霏微瑞露濕，沆瀣欲走誰能拏。始悔從前負此腹，鎮教病母淳滋窠。鐵心老仙玉龍吼，虹影珠涎笑霜首。瑤林春色太清空，亦告醯醢遭磨臼。珍珠能紅翠濤綠，如此塵名何足錄。游鯉山下老園丁，把杯吸盡君山青。厥有佳號能倣此，當

時獨醉歸烏涇。吾儕同作太平客。且與爛醉忘蓬萍。王原吉酒名 蓉城霞此酒平生人不識。我昔見之爲君憶。紫官仙兔忽西匿。天妒瀛瀾炫奇色。素娥爲攀若木枝。蘸海洗出紅玻璃。綃衣相薄懷不得。憑誰偷拾來金卮。海仙覓醉恐誅索。到君卽盡君勿辭。赤城崔巍屨市雜。一遣華蓋銷磨之。人間小戶螺蠡耳。右手猥瑣誰能持。

牛鳴東邨三首

豆架瓜籬白竹門。桔槔聲歇打場喧。老農八十閒無事。擇蠶殘陽倚廢垣。曉寒如箭宿雲屯。白樹溪橋紅葉邨。人事不來書卷合。一樓寒雨看秋原。年年塵跡滯天涯。柳線成邨稻沒車。爲把閒廳僦閒客。秋來賺種滿園花。

九日

閒居愛重九。孤抱喜風陰。小步野花亂。讀書秋院深。晚天寒有意。霜木瘦無心。交際平生失。樽前思不任。

早春幽居

懶從輪鞅熱。終日閉閒扉。細雨濕春意。幽花寒袂衣。開書懷抱冷。逢客語言稀。小庾自縈思。扁舟春水肥。

王氏丹

字方若。號樓村。寶應人。凝鼎之子。康熙壬午舉人。癸未會元狀元。官翰林修撰。分修皇輿表。甲申。修

與鄉士大夫論文爲樂。士多從之遊。著樓村詩集。二十五卷。殿撰子抑大孝廉。雍正初宰烏程時刻之。海寧查初白。推其詩。以爲俯首下心。所兄事者。

雨中憶縱悼園呈喬侍讀表叔

只有無慙抵暮春。闌風長雨泥芳辰。不教林壑頻經眼。枉是鶯花解趁人。草發舊岡青霧霧。水穿新汶碧鄰鄰。仙源一棹何時撥。待放晴光漾麴塵。

養痾閒掩子雲亭。硯墨流凹晝注經。紫燕定依簾閣見。黃鸝還傍舫齋聽。劇憐茆舍通城角。未怕籃輿過水汀。尚有桃花將柳色。帶人沈醉待人醒。

送湯逸林入都。卽致湯西厓編修。劉後齋都諫。

今年早熱月在午。千里出門不知苦。聞君欲別飲君酒。酒酣問君向何許。往者汗漫遊長安。一峰草堂北道主。謂侍讀喬公。白門太史深相知。旅舍乃能致脩脯。逸林前館於胡璞崖先生。名人畸士紛京華。出入馬蹄覓儔伍。百尺

梧桐閣正開。萬丈長虹氣能吐。時較門先生深相接遇。微名得失何足論。相知所貴寫肝腑。人生合散風中煙。迸淚

晨星詎堪數。歸來至竟不稱意。卜畫蕭條守環堵。逸林所居名卜畫堂。叢卉春垂三徑雲。老松秋亞一枝雨。收身聊

樂茗香清。顧影却慙鹿豕聚。乍提襖被辭妻孥。復走長安作羈旅。十年往事難重陳。欲埽何門行踽踽。故

人惟有湯與劉。青瑣紅蘭鸞鳳侶。南州榻下好淹留。公孫閣裏方延佇。計君到時夏正深。雪藕銀桃勝甘

乳。易酒一斛洗頭塵。提攜如意蹋筵舞。余方墨守餘幽憂。寂寂徒令笑鄧禹。爲致兩公相問訊。離緒萬端

憑告語。

和友人南歸舟中詩

行李蕭蕭視蒯緱。客途冉冉送牢愁。此時夢斷元都樹。特地魂銷黃葉秋。雲度明河方絡角。山銜新月半留鉤。荒城漏徹知何處。兩岸酸風兩槳舟。

送顧書宣太史假歸兼訊史蕉飲太史。卽用其集中倡和詩韻。

落落名士空山僧。俯視濁輩紛蚊蠅。而此眼如鍼孔者。見不類己心所憎。今之名士其有幾。我識君面前。年曾鄧林陸海鉅材藪。卓犖大斲操鉤繩。蕪城千年罨煙月。寂莫誰與同聲應。天下健者稱史子。霜霄颯躡盤蒼鷹。大橋市上歌相屬。雙峰屹立爭峻嶒。卯辰之歲有先達。飛鑣籜影高雲乘。別館華蟲好文采。醉眼問天方薈薈。去年秋風一戰霸。今年早蹋龍頭登。射策天門聞天語。玉皇仙吏良足矜。回頭碌碌視餘子。一時洗眼羣嗟稱。詎知敏中耐官職。舊時意氣無添增。繫余控地類鷓鴣。翹首不逮摩天鵬。憂如漉衣坐空館。差池知翼慚蹇騰。把君雄雉詩過目。詞華哲匠非余能。黃門寓齋文字飲。相逢一笑傾千升。君今暫歸鳳雛開。我方久客魚粘罾。篝火只可恣夜睡。闔扉已復忘晨興。天邊忽傳佛屋句。蕉飲廬後。有佛屋詩十二絕句。自號前休居士。舌撻語硬清冰稜。從頭細讀一旦再。暗風窗罅搖殘燈。豈其示疾果大悟。平生誅宕今知懲。淮南蘄北二千里。搢頤極睇雲層層。朝來送別兼憶舊。微雪乍霽寒空澄。驟綱結束候早發。日摧鞭影纒東昇。我病畏寒闕祖道。擁被作歌頭鬢鬢。居士未來君正去。長安索莫誰文朋。到家倡酬勒新咏。却寄不用煩鈔

膽。

鐵脚道人詩

雪沒山尖插雙脚。一掬寒香沁鰓鰾。閒披沆瀣索元珠。獨倚煙嵐招白鶴。祝融之峰何崔巍。盪胸雲海紅輪開。道人一笑凌雲去。惟有霜風吹老梅。

燕游諸子讌集詩

歲月如奔蛇。鴻泥幻爪指。面目故依然。相逢笑相視。二載滯京華。爲懽賴諸子。駕部愛留賓。咄嗟每立庇。下馬傾玉缸。午酣夜未已。都忘羈客愁。但聽足音喜。天風吹鳥羣。次第集沼沚。隔歲俱言歸。先後差可擬。水毀忽告災。沈憂積屯否。翻思長安樂。跼蹐詎似此。嚴冬二之日。草白冰壓水。高林無殘葉。蜜脾綻寒蘂。招邀開良宴。公榮騰一紙。番更互主客。起某至某止。高陽舊居徒。迭邊雪霜裏。恍疑宣武門。小閣滿屣履。肴陳鄉味新。酒勝易涑美。觥籌乍翻槃。酣踟旋沸耳。回頭念紛綸。世事勿挂齒。且入無功鄉。更味謫仙旨。大塊皆逆旅。不飲嗤吝鄙。倘免走踐踐。長共懽爾爾。

惜別謠

雨霏霏。風微微。感春客子攜春歸。鶯紅飛盡結楊柳。杜鵑嘯瘦腰幾圍。蘭橈划動清歌起。楚尾吳頭千里。誰其遺之金錯刀。手把瓊英照江水。

燕壘謠

前溪啄晴沙。晴沙裏落花。別院掠微風。微風接飛蟲。呢喃只傍觚稜東。側翅珠簾第幾重。灘灘野鳥湖之
淡。朝鳴暮宿菰蘆裏。不須苦羨雕梁壘。自引雙雛拍春水。

呈少司農睢州公

文憲聲華濯錦明。衣香天際紫雲橫。柏臺舊擅張昇譽。稼部新題李絳名。鐵柱彈文傳審諤。宣房楫石待
成平。公有奏彈河臣疏。又
有請修高堰石工疏。九重倚畀方南顧。定有龍綰被上卿。

題新城王公放鷗圖

山堂宜高秋。疎風聽林樾。宵窳不逢人。但見寥天月。達人飽世味。其中自冰雪。黃葉滿故山。眷言成久別。
萬族各有懷。低徊在羈縲。開籠任飛飛。投林影飄忽。

奉詔增修皇輿表院中卽事次韻顧書宣前輩

瀛洲亭畔靜階除。匱匝槐枝亞碧虛。池面輕風迎散帙。檐牙初日照繡書。共知定本推前輩。未敢傳鈔付
小胥。東觀從容參典校。駒駘載筆媿庸疎。

栖塵簾閣喜新除。祕冊駢羅几席虛。周室職方傳舊志。漢家年表效橫書。要從鞬轡增圖籍。豈爲華離問
史胥。理罷縹緲方永晝。垂鞭歸拂晚風疎。

久病初起。攜次兒懋訥。早赴武英殿纂書。

殿閣榮光照碧虛。喜叨職業日繙書。朝昏徧歷三門地。父子同乘一馬車。御苑暖風花氣合。瓊窗晴旭鳥聲初。自憐帶孔頻移後。囊筆從容近玉除。

李蒼存惠涼鞵索詩

繆絢編草製新奇。踢月乘風稱此時。珠履羞爲黃歇客。麻鞵記得杜陵詩。坐中請度我何敢。足下生雲君共之。辦取筇枝兼箬笠。相攜深谷採華芝。

慈仁寺之東。舊有揚州會館。余于五月二十二日。移居其中。劉大山同年。爲賦詩三章。依韻奉酬。

忍冬花發老藤纏。香簇新居卜日遷。剛得一巢逢燕語。移居時值燕來營巢。豈能百足荷夔憐。舊時家具移茲地。向

後皇恩駐幾年。多愧草堂煩錄事。杜陵那有賣書錢。同年張珠巖贈草堂資。

大地鄰虛總一塵。冷官隨處可容身。栽花種樹閒中事。愛酒憐詩我輩人。桑下豈惟三宿戀。庭前有桑一株。槐陰

也作兩家春。鄰家古槐蔭。却思舊雨東西路。千萬還應更買鄰。

且裘榻上幾編書。休認溪邊自結廬。用曹唐語。拙比林鳩聊可住。遠隨風鷁欲焉如。高軒韓愈能停屐。小圃

周容待剪蔬。一任門前閑車馬。檐花對酒莫踟蹰。

王懋竑。字子中。寶應人。康熙戊子舉人。戊戌進士。在京師。以廉潔爲李安溪、湯潛菴、二公所稱賞。分派教習期滿。當授縣令。以養母求教職。遂授安慶府教授。雍正元年。硃筆寫出。蔡世遠、王懋竑、喬崇修、此三人

著調來京。懋竑撰翰林院編修。尙書房行走。敬謹盡職。尋丁母憂。奉旨治喪畢。卽來京。懋竑哀毀盡禮。葬畢入京。舟車之問。如居苦由。養痾京邸。不見一客。半載。得以老病告歸。家居十六年卒。年七十四。懋竑與同邑朱正齋。共講朱程性理之學。而懋竑尤能精考經史。辯明朱子易本義首九圖。爲後人所屬。謂尙書古文僞出。蔡氏所計本。未必盡得朱子意。又考朱子詩傳內。所用叶音。今多遺脫。輯所辯證之文。爲白田雜著八卷。又著朱子年譜四卷。考異四卷。附錄二卷。皆收入四庫書目。又著白田草堂存稿二十四卷。續集別集。朱子文集注。朱子語錄注。讀經記疑。讀史記疑。偶閱雜鈔。共若干卷。

校禮記注

聖王遺跡付飛煙。收拾流傳幾歷年。后戴別分曲臺傳。皇熊初爲鄭公箋。欲將宋槧填遺字。更擬唐碑校昔賢。却怪後人輕正義。衛陳俗說競紛然。

王懋諶

字鶴聞。寶應人。式丹長子。康熙辛卯舉人。著有岸秋亭詩一卷。

雙樹曲

黃銀燈閃春容媚。疆陣愁逢織指膩。雙暈芙蓉酒上時。金牌暗繫冬哥臂。狼藉長安玉局春。辛夷別館生紅塵。背花耳語未輸意。重壁蠻牋青鳥噴。

月夜飲縱棹園

十頃波光儂著醉。秋宵如在鑑中行。山腰轉處遠人語。港口樺來聞草聲。雲卷天容雙眼迴。水含夜影一船清。中流孤嘯氣豪上。希逸當年無此情。

斗室次韻

生小瓜廬可半弓，書郎好倚過深冬。孤斟偶遣閒愁淺，僵臥還驚舊夢重。但有月來清興滿，更無人到暗香封。就中事事耽幽意，只是詩豪未暇慵。

過漁山堂

古木陰森點點鴉，下亭一道暮煙斜。水邊記著詩人影，小立涼天看藕花。

王懋訥

字抑夫，一字懿誦，江南寶應人。修撰次子。康熙己卯舉人。充武英殿纂修。雍正初，官烏程縣知縣。修撰壬午登賢書。癸未中會狀。登科後於抑夫數年。抑夫官烏程五年。多惠政。嘗繪牧牛圖。邑紳沈編修樹木題

之云。郊原雨後草齊青，閒領春光過別汀。知以牧民心牧犢，不須重覓相牛經。以後詩數首，從烏程人陳訓導焯處錄得。

留題歸雲菴二首次呂石窗和木老人韻

鶴去瓢空挂，堂高頰舊顏。寄懷招隱士，放眼看青山。竹樹濃陰合，風波淨土閒。已公能愛客，石磴幾躋攀。伏虎留遺跡，皈心禮佛巖。未堪登彼岸，早已落輕帆。月露侵簾幌，松風冷葛衫。白雲歸不散，好與一囊緘。

次韻和陳愷齊二首

何處堪消暑，歸雲澗谷中。樹圍山下屋，竹弄雨前風。俊逸皆同紀，疎狂莫笑融。卽今幽興足，不借漢家宮。

余在都中，先與令弟漢亭相識。今與愷齊聞三，同來避暑。

何處堪消暑，清陰綠墅中。一池瓜蔓水，四面稻花風。路隔塵寰遠，心從火宅空。晚涼看月上，樹影落東峯。

次韻答吳五亭孝廉斯洛

爲愛名山景物幽。待消煩暑暫淹留。泉奔曲澗纔過雨。濤起高松已送秋。王翰卜鄰寧寂寞。武陵下筆最風流。峰前峰後無多路。乘興還能策杖不。

君。今才調執爭長。路暗投入詫夜光。市上彈箏原迭邊。燈前擁髻亦淒涼。投閒自愛吾廬好。觸熱應憐去日忙。一枕羲皇明月上。五湖煙水正茫茫。以上並墨迹。留歸雲菴中。

遊二峯仍用前起句

何處堪消暑。相攜上二峯。院深無日到。門靜有苔封。酌水風生腋。登巖雲盪胸。心清聞了義。歸及上方鐘。二峯有華光泉。淪者極佳。伏虎巖在其側。老僧案頭。有金剛經解。余全閱一過。故並及之。

歸雲

會聞嶺上白雲多。幻作奇峰意若何。留與山中伴孤鶴。羽衣霧葉兩婆娑。萬壑千巖蟲面開。從龍昨夜自天回。人間自是多霖雨。何事閒雲出岫來。

王希伊

字耕伯。號在川。寶應人。懋竑孫。乾隆辛曾舉人。官陝西白水縣知縣。實心愛民。不利于民者。不恤觸上官怒。以與之爭。朱笏河學士致書云。今日能以朱程之學。著卓魯之績者。非君而誰。以病改松江府青浦縣

教諭。時書制府麟。巡撫安徽。制府幼時。嘗從耕伯遊。過青浦來謁。耕伯書四語贈之云。上報君恩。下守庭訓。採擊壤歌。扶太平運。未幾病歸。卒。年七十六。著有青白堂存稿十二卷。彭衙存稿十卷。由拳存稿四卷。詩集十卷。

愛讀碑文

二百青銅燕市得三千里外署中隨。於今勒石昭天壤。拍手來看愛讀碑。

丙申。得楊椒山先生字。愛讀秦碑兼漢篆。好尋奇字到雲亭。楊繼盛

書。攔來白水。戊戌春刻石。

劾嵩草藁在祠堂。會與容城令一商。若得鉤摹金石永。周吹何止滿城香。

前會試場中。晤容城令之弟云。公疏

藁存祠堂。新令到在必呈閱。余曰。幸語令兄。陞任後當屬止其事。欲看到祠堂請觀可也。茲以愛讀碑。並顏魯公草藁碑。寄城令。請以草藁勒石。公朝審詩云。風吹柳鎖滿城香。臨刑詩云。浩氣還太虛。丹心照萬古。

繆肇甲

字學書。號補山。泰州人。以子沅貴。贈刑部侍郎。

景州道中知山妻復病寄沅兒。

亦念吾身苦翻憐爾母危。一年多病日。雙淚教兒時。躑躅趨長路。殷勤寄遠詩。到來天際雁。

時得沅兒信。

慰得

客中思。

廣陵雜咏

春波明映酒盈卮。獨憶簫聲踏月時。不道紅樓秋欲老。更無人唱竹枝詞。

